

ASO FARAILE, 27 OKETOPA 2023

Na nofoia e le Fofoga Fetalai le Nofoa i le itula e 9:31.

Tatalo.

FOFOGA FETALAI: Ou te faasilasila atu ua amatalia nei Tualumaga a le Fono Aoao Faitulafono.

O le a le toe talatalaina sa ma faigā o le Maota nei, o paia lava ma mamalu e le avea, i le afio o lau Afioga i le Tamaitai Palemia, afio lau Afioga i le Sui Palemia, afifio a outou Afioga i Minisita o le Kapeneta faapea foi a outou Afioga i Minisita Lagolago. I lea Itu, afio lau Afioga i le Sui Taitai o le Itu Agai ma sui usufono mamalu uma o le Palemene. O le viiga o le Atua e le faaitiitia ona o lona agalelei faasoa ua mafai ai ona tatou toe fesilafai i le manuia, faamalo le lagi e mama ma le soifua manuia.

Ou te faatalofa atu foi i le paia o Ofisa Sili o Pulega o Matagaluega, Faalapotopotoga Tumaoti o le tatou Malo o Samoa i ona tulaga faalupelupeina, matou te faatalofa atu.

O le alofaiva o le tatou Maota i lenei taeao, ia, o tulaga masani lava o le aso lenei e manava tatou galuega i le itula e 12:00 i le aoauli. E le o toe toatele foi ni sui usufono mamalu e le i saunoa, ia faatofa mai lagi so outou finagalo aua le afaafaina o le tatou vaa e fautele.

Manuia le usugafono a le Palemene i lenei taeao, manuia foi le faafofoga tapuai mai a si o tatou atunuu.

ILOILOGA O LIPOTI A KOMITI FAA-PALEMENE

**P.P.2023/2024 NU.49, LIPOTI A LE KOMITI O TULAFONO TUMAU, MATAUPU TAU FAIGA PALOTA, TALOSAGA MA TOFIGA FAALE-FAAVAE I LE P.P.2023/2024 NU.37, LIPOTI A LE KOMISI SUESUE O FAIGA PALOTA 2021, FEPUARI 2023 - felafolafoaiga faaauau
– Aso fono lona 3**

FOFOGA FETALAI: E tolopo Tualumaga a le Fono Aoao Faitulafono i le aso Fono ananafi ua maea saunoa le sui usufono mo Aleipata Itupa i Lalo. Ia, o le avanoa lenei mo se tasi o sui usufono mamalu i le tatou Lipoti. Se i tulai mai lau Afioga i le Minisita, lau Afioga Leota.

Afioga Hon LEOTA LAKI LAMOSITELE (Palauli 2): Faafetai i lau Afioga i le Fofoga Fetalai mo le avanoa. E faatalofa atu foi i le paia o le Maota i lenei taeao, le afio o le Afioga i le Palemia, Afioga i le Sui Palemia, le mamalu o le Kapeneta faapea foi Minisita Lagolago.

E faatalofa atu foi i lenei Itu o le tatou Maota nei, le susu o le Taitai o le Itu Agai faapea le mamalu o sui usufono ua tatou faatasi i lenei taeao. E faapea foi ona faatalofa atu i le Ofisa o le Fono, le mamalu o sui o Matagaluega eseese o lo o tatou faatasi.

E momoli atu foi le faatalofa i le paia o Samoa ua potopoto i lenei taeao, le paia i Le Ao Mamalu o le Malo ma le Masiofo, Sui o le Fono a Sui Tofia ma le Faletua faapea le tapuaiga a Samoa ua faalogologo mai i itu e fia o le kelope i le tapuaia o le tatou fonotaga pei ona tatou alo atu i ai.

E faatalofa atu foi i le paia o le Motu i Sasae i le Faigamalo a Tutuila ma Manu'a, afioga i le Kovana, Sui Kovana ma le mamalu o le Palemene i ona muliauma eseese.

E faapea foi ona ou faatalofa atu i le mamalu o le aufaigaluega paia a le Atua i ona fatafaitaulaga e fia o lo o tapuaia mai foi le tatou fonotaga. E faatalofa atu foi i le paia o si o matou Itumalo o lo o nofo tapuai mai, paia i Tapaau e Fa, Faleupolu e Fa ia faapea le lasilasi o le tatou Itumalo, faamalo, faafetai le tapuai.

O le a taumafai atu ia se manatu mai le sui usufono o Palauli 2 e tusa ai foi ma le tulaga o le Lipoti e pei ona alo atu i ai le tatou fonotaga. E faamalo i le Komisi mamalu aemaise le Komiti o Tulafono Tumau a le Maota mo le galuega mae'ae'a lelei, o lea ua taulimaina e le Palemene. Ua outou sasaa faaoti le utu a le faimea ma fesuata'i le aulapauta ma le aulapatai ma outou sulu le aliti aua figota lelei mo le tapuaiga a Samoa. Faamalo le tauata'i faamalo le galulue.

E faaleoina ai le agaga faafetai a lenei Itumalo o Palauli 2 aua le afifio o Tapaau e Fa ma Faleupolu e Fa e tauala atu ia te au nei o le Tofi sui usufono ona o lenei galuega tele ua mae'a. E i ai le talitonuga sa tele luitau ma lavelave o la outou galuega ae sa outou punoua'i lava aua le alofa moni mo Samoa. E maualuga le faamoemoe o le a tele ni mea lelei ma aoga o le a tutupu mai mo le manuia o Samoa ma ona upufai i le lumanai ona o lenei galuega. E pei o le mau ua masani ai le atunuu, e maua figota lelei o se faatautaiga ina ua tele sulu ma e mama foi se avega pe a tausoa ma pulupululima faatasi.

E ui i lea, o lea ua taoto le Lipoti matagofie a le Komisi, ae manatu lou nei sui usufono o Palauli 2, e ao pea ona momoli atu sona sao e faaali se lagona i nisi o mataupu e talitonu e ono toe silasila toto'a i ai le Maota aua le faamautinoaina ua malu le fa itu uma ina ia le toe satia le folauga a Samoa i ona upufai. E asu atu ai vaimalu i puega pe afai e i ai se gagana a o se lagona foi e le tusa ma se faafofogaaga. A o le talitonuga o lenei foi Itumalo ia lumamea sona talitonuga aua o Samoa o le fala e lafo i luma a o le ato foi e fevailia'i.

Ia alofagia e le Atua le sufiga o le tofa ma le moe a Samoa ina ia numia le fa ma ia togi le pa tau le ave aua nei ma le faavavau.

O le mataupu muamua e fia laga atu, o le fesuiaiga o nuu o Itumalo o lo o aafia ai si o matou nuu o Gautavai i Palauli le Falefa. E i ai se lagona o Samoa o le atunuu tofi aua e talataua Toga ae tausua mavaega Samoa ma e le o se atunuu e

taliola. O le ala lea e manatu ai Palauli le Falefa, o le faatula'i mai o lea mataupu e aveese ai se tasi o nuu mavae o lenei Itumalo ma tuu atu i Palauli 3, o se mea e le taliainagofie i se lagona. E tele vaega e mafua ai ona manatu lenei Itumalo o se faiga ua le talafeagai lea gaoioiga pe a faatino. Ae peitai, ona o le faalogologo atu i felafogaiga foi o finagalo o sui usufono i le tatou mataupu, ua maua atu ai ua tele ina fulisia ma faapea foi ona lagolagoina le Lipoti a le Komiti, i le toe faafoiina o le filifiliga a Itumalo Faapalota agai i Itumalo Faaalaalafaga.

O lea la o lo o lavea faatulaga mai ai ia le... o le faafo'iina la lea ua tau mafanafana mai ai ia le loto ma le mafaufau ona o lea la ua le aofia ai loa fesuaiga ia ua uma ona fautua mai ai le Komisi. Ae ui i lea e fia faamau pea le finagalo o Palauli le Falefa e teena ai le finagalo lea o le Komiti i le siitia mai lea o Gautavai agai i Palauli e pei ona fautua mai ai i le Lipoti.

FOFOGAFETALAI: Lau Afioga i le Minisita po o le Komiti po o le Komisi, mo faamaumaga a le tatou Fono?

Afioga Hon LEOTA LAKI LAMOSITELE: Komisi. O le Komiti lea sa faia le fautuaga lea i le toe siiga o... a o le Komisi lea na aumaia le fautuaga i le siitia o Gautavai agai i Palauli, lea e faamau ai le teena a le sui usufono lenei ina ia lagolagoina le tulaga ua fautuaina mai e le Komiti Faa-Palemene.

O le mataupu lona lua, o le mataupu lea e faatatau agai le 10% pei foi ona logologoa ai foi le tatou Maota i lenei mataupu o le 10% mo sui usufono tamaitai. Sa ou tau matauina ma tilotilo agai i maliega ua uma ona sainia e le tatou Malo, le Malo Aafaatasi e uiga i le mea lea o le taumua tutusa o le atinaeina o Alii ma Tamaitai ma le puipuia o aiatatau a tagata aemaise lava sauaga agai i tamaitai.

E faataua le manatu lea aemaise pe a faapea o lea ua uma ona lagolago e le tatou Malo, e le gata i le tulaga foi i le Malo ua tuanai atu, le Nofoaiga ua tuanai atu a o le Nofoaiga lenei. E le tau tolaulauina atu foi i lo outou mamalu le mafuaaga. O auala la ia sa taumafai i ai le tatou Malo ina ia siitia, lea la e mafua mai ai le 10% lea. Ae peitai sa i ai foi nai faafitauli o lo o tulai mai ona o lona faatinoga lea la pei o lo o faapea ai ona faafefiloi mai finagalo i le lagolagoina ma le lē lagolagoina.

E matau atu foi i le faatulagaina mai o le fautuaga a le Komiti o lo o i ai foi ni mataupu e tatau foi ona taumafai e faamanino lelei ina ia iloa ai le tulaga e tatau ona i ai. O le manino ia i le matau atu, e tatau ona toe faamanino lelei ina ia mafai ai ona faatulaga lelei po o fea tonu le mea e agai i ai le finagalo o le Maota nei. O le faaitaiga i le tulaga lea, e le faamanino pe a faapea e manuia mai le sui usufono i le 10%, o le a le eseese o le sui usufono lea ma le sui usufono lea ua filifilia e lona Itumalo. Aua ou te iloa lea tatou te silafia lelei, e i ai le taimi e tulai ai i luga le sui usufono ma tolaulau mai foi manaoga o le latou itumalo, a o lea foi e nofo le sui usufono lea na filifilia e lona itumalo ma lana foi lisi o manaoga o lo o aumai. I le matau, e pei o vala ia e tatau ona toe faatulaga lelei pe a faapea o le finagalo e faaauau pea le 10% lea.

O lau lava matau toatasi i lau tilotilo i ai, e ui ona o lea e taumafai le tatou atunuu e uunaia pea le vaega lea, ae le o lava po o atoatoa foi ni tapenaga o lo o fai e tatau ai ona uunaia pea le mataupu lea o le faatoateleina o numera o tina ma tamaitai i totonu o le Palemene. O le tausaga ua tuana'i atu e tele ina faalagolago i polokalame o aoga e mafai ai ona fesoasoani i le mataupu lea. O lea ua ou matau atu foi i le galuega a le tatou Malo sa fai i tofiga ia sa fai i le tatou polokalame lea o le \$1 miliona lea na faatulaga ai, e 7 tamaitai e tatau ona i totonu o Komiti a itumalo. A na le faia le Tulafono lea, e le toatele faapea ni tamaitai e i totonu o le taiala lea, e le toatele faapea ni tamaitai i totonu o fonotaga a itumalo...

FOFOGA FETALAI: Toe lua minute o le sui usufono.

Afioga Hon LEOTA LAKI LAMOSITELE: Ma o lea e matau atu o le mataupu lea i lau tilotilo atu i ai, o lea la ua tele le suiga i pulega a itumalo, talu ai le auai o tamaitai. Ae o le a faapuupuu lau mataupu ona o lea ua toe 2 ou minute.

Ou te lagolagoina le faaauau o le 10% ona o mafuaaga nei, e tatau ona toe taumafai e uunaia pea le vaega lea.

Lona lua, e tatau ona toe faatele avanoa e mafai ai ona tauva tamaitai i le palota. Faataitaiga, o lea ua i ai tatou matai, o le a la le mea e le mafai ai ona alu le Saotamaitai i le palota pe afai o lea? Aua o lea ua tatou malamalama lelei i le saofaiga a Samoa i totonu i i le amanaia o tamaitai. Ia aua o le Saotamaitai foi la e sa tapa lana ipu ma tulaga uma faapena. Ia o se mea tau ina faataatia atu i outou autafa.

O le isi vaega, o le a la le mea e le tuu ai i luga i le 10%, tatou faaaogaina Vaega Faaupufai. A faapea o lea o le a tauva i le palota, ia le i lalo ifo o le 10% le aofai o le numera o tamaitai e i totonu o Vaega Faaupufai e tauva i totonu o le palota. O se faataitaiga; a faapea e 60 sui tauva a se Vaega Faaupufai, ia o lona uiga la o le 10% o le 60 e 6. Ia le i lalo ifo o le 6 tamaitai e tatau ona tauva i le palota. O lona uiga la e le i faia le palota, ae o la e ua tele le avanoa e tauva ai tamaitai aua o la e ua lagolagoina e Vaega Faaupufai. O se tasi la lena o vaega e o faatasi. O lona uiga e lua avanoa e tuu i ai i tamaitai, o le o i totonu o le palota ua lagolago e Vaega Faaupufai, a le sao ona toe faaoga lea o le 10%. O auala ia ou te fai atu ai, ona o le tatou taumafaiga e tatau ai ona tatou tilotilo po ua tatou ausia fuainumera ia ua uma ona tatou saina ai, i maliega ia ua uma ona fai.

O le isi mataupu, o le taumafai e galulue ma nuu ma alaafaga, ia talia tamaitai i totonu o saofaiga a nuu. O se mea e tatau ona galulue agai i ai le tatou Malo ina ia mafai foi ona faaulu ai i totonu tamaitai i totonu o le vaega lea, faapea foi ma tamaitai ia lagolagoina e nuu pe a faapea o lea o le a fia alu se sui tamaitai, ina ia mafai ona lagolagoina e nuu le vaega lea. E faatopetope atu, e lagolagoina lava le tulaga lea o le... e talosagaina le Komisi i se latou galuega faaauau, e toe tilotilo i mea o palota ia mai fafo ona ou te lagolagoina lava le

taumafai e palota mai, ae ou te iloa o le faatonutonuga o le faatinoga o le palota lea e tatau ona toe tagai agai i ai ina ia mafai ai ona tupu le mataupu lea.

O le mataupu mulimuli lau Afioga i le Fofoga Fetalai, ou te lagolagoina mataupu ia o nofoa ia e tolu e ave i Savaii, aemaise lava nofoa ia ua faapitua agai i nofoa o Pule. O lea la ua i ai Pule o lea ua faaopoopo a o lea foi ua faaopoopo mai ai ma Aiga i le Tai. Ou te manatu ou te lagolagoina lava. Na pau lava le mea i lou manatu, e tasi lava le Aiga i le Tai. O lona uiga la i lou mantu vaivai, e tasi la le sui o le Aiga i le Tai. A o nai isi alalaafaga ia lea ua i uta i le taimi nei, e tatau la ona toe faaofi pea i totonu o se Nofoa Faaopoopo. Ae ia ne i te i ua ou sese, ae o lau vaai i ai, o Aana la e tatau ona taatia ai le Nofoa lea, Aana 5 pe afai ua i ai le 4, ona Aana 5 lea, ona lua ai lea o Nofoa i i, o le Nofoa o Aiga i le Tai ma le Nofoa o Aana 5 e talafeagai ma le mea lea o lo o momoli mai foi e le Lipoti.

O le mataupu mulimuli lava, e tatau ona amanaia Tumua. E 11 pou o le tatou atunuu, lea la ua faamalieina pou e 6, a o le 5 lea e totoe, e tatau la ona tilotilo i ai pe faapefea ona faatulaga lelei ai Samoa i totonu i i. Aua o le model lea ua tatou faia, o lea ua tuu i totonu le faaleaganuu i totonu o le tatou filifiliga. O lona uiga la, e tatau ona i ai se nofoa o Lufilufi, faapena Leulumoega, faapena foi Tuisamau. Aua o lea ua taatia le isi vaega lea ua manino ia ona atoa ai loa lea i ina. E le o tele la ni nofoa o totoe ai. E 55 nofoa tatou te ausia pe a faapea tatou te oo i ai i le vaega lea, ou te lagona o la e lava e talafeagai, o la e lava le tupe a le Minisita o Tupe e mafai ai ona lagolago se suiga o fuainumera talafeagai mo tatou.

Faamalo faafetai tele lava i lau Afioga i le Fofoga Fetalai e tusa ma le avanoa, faafetai foi Samoa i le faalogologo mai, aemaise foi o si ou itumalo ae manuia le Fono. Faafetai.

FOFOGA FETALAI: Malo saunoa i lou tulaga faa-sui usufono vaeatu lau Afioga i le Minisita o Palauli le Falefa. Malo faafetai.

O le avanoa lenei o se tasi o sui usufono.

O lea la ua ou vaai atu pei ua maea le tatou... Oi, ia, tulai mai le sui usufono mo Faleata 3, 15 minute.

Tofa LEALAI PULE RIMONI AIAFI (Faleata 3): Faafetai. Ou te muai faatalofa i le Maota o Samoa, ma ou faatulou i le Maota e poupu i le tofa ma le faautautaga, e ato e le faaaloalo ma le feavaavatai, ae faavae i le faavae papa o Samoa, o le Atua Soifua.

Ou te muai faatalofa i lau Afioga i le Fofoga o le Fono, i lou ee papa i le Nofoa o Samoa. E faatalofa i lau Afioga i le Tamaitai Palemia, lau Afioga i le Sui Palemia, le mamalu i le Kapeneta ma Afioga i Minisita Lagolago.

E faapea lea itu o le malu i lau Afioga i le Sui Taitai ma le paia o sui usufono o lenei Vaega Faaupufai.

E faatalofa foi i lau Afioga i le Failatusi ma le Sui Failautusi ma le aufaigaluega a le Fono Aoao Faitulafono, ae a Ofisa Sili o Pulega o Matagaluega le Malo.

Ou te faatalofa i le faafofoga ma le tapuaiga a Samoa, i le Afioga o Le Ao Mamalu o le Malo ma le Masiofo, le Afioga i le Sui Ao ma le Masiofo, ae a Samoa i ona tulaga faalupe.

E faatalofa i le tapuaiga a auauna totofi a le Atua ma ituaiga paia aemaise le Afioga i le Faamasino Sili ma le Vasega o Faamasino ma Samoa i lona aoaotetele.

Ou te faatalofa faapitoa foi i si ou Itumalo, ua loaloa aso e le i toe faafofoga i lou leo, malo le soifua, faafetai le tapuai mai. E le galo la outou tatalo ma la outou tapuaiga i le ao ma le po, e manatua pea e le galo, e ola i le loto la outou tapuaiga. O nai ou aiga, o uo ma i latou e lagolagoina lenei sui usufono, aemaise i taimi faigata, o taimi o aave i auma faasufiafa, ia, na o le faafetai e mafai ona ou tautala i ai. Ma le tatalo ia sautualasi faamanuiaga o meaalofa a le Atua ia te outou, ma le naunau ia aua ne i galo i le loto lo outou agalelei.

Ou te faatalofa foi i Afioga i Minisita fou o le Kapeneta, le Afioga ia Lautimuia ma le afioga ia Laumatiamanu, malo, manuia le lua tulai mai. Ou te faamanuia foi ma faatalofa i ou uso a sui usufono ua toe faatautoina i lona Vaega Faaupufai, ia manuia le tou see atu i lona itu.

Ou te manatua foi i lenei taimi si ou tama ua faailagi le folauga, o le taimi muamua lenei ua ou sau ua leai sau faamanuiaga. Ia, Talo, e talitonu ua e auai atu i le oliolisaga tumau ma mama i le ola e faavavau. Faafetai mo mea uma.

Lau Afioga i le Fofoga o le Fono, e viia ma faafetaia le Atua i lenei taeao. Ua loaloa aso e te le i toe silasila mai. Faafetai ua tatou feiloai. O le mea moni lau Afioga, e le toe oo sau tala i fatia ua sola, alu ia le taimi ma ni ona faafitauli, aua ua tusia, o le taimi ma le mea e tupu ai. O aso vevela, o aso malulu, o aso lelei ma aso soua, ae tatou faatuatua i le Atua o ia e sili Lona silafia i mea uma. O a eseese o tatou finagalo, ia taatia, tatou maua le loto faamagalalo ae alo aua le sa o Samoa, manuia Samoa o le tatou Paeaiga ma le tulai mai. Ia manuia lau Paeaiga lau Afioga i le Fofoga o le Fono.

Ona fai lea o sou manatu i lenei mataupu taua ua taatia i lumafono. A talanoaina loa le Tulafono lenei o Faiga Palota, e leai se sui usufono o le Palemene e toe fia nofonono, e faaali uma manatu ma finagalo, leaga e taua. E i ai le upu foi lea i le Tusi Faitau Pi a tamaiti, *'e fia fai moa uma tama'*. Ae tatou te faaeteete foi i o tatou finagalo ma manatu e fai, ina ia aua ne i faaituau i o tatou manatu faapito mo i tatou ma lenei taimi ae galo ai le tatou galuega mo le agai i luma ma le lumanai. Aua o le mea moni lau Afioga, o le Lipoti lea a le Komisi na tuuina mai, e leai ni mea fou o i ai. Atonu foi e aoga si umiumi laitiiti o i ai i lenei galuega po o lenei nofoa ua lava ai le malamalama i nai nisi o itu. Ma atonu o le ala foi lea ua faafaigofie ai i le Komiti o le Palemene ona teena le tele o suesuega a le Komisi, ona e le o ni mea fou le tele o vaega nei.

Ae momoli le faafetai i le Komisi. Ma o faafitauli nei, mai lava i le tele o tausaga. Ma o manatu foi nei e fai atu i lau lauga i le aso, o ou manatu foi nei e fai i Komisi Suesue uma lava na ou auai. Ma e o le fa ai lenei o Komisi Suesue ma e le misi se Komisi Suesue io u manatu ma au tuualalo ae o mataupu lava nei e tasi. Ua uma ona faaali e le Afioga i le Taitaifono ma le Komiti a le Palemene, ana faapea e aumai le Lipoti faapea mai e teena atoa le Lipoti a le

Komisi, e le toe umi sau upu. Peitai ane, ona o lea ua fai le finagalo o le Komiti i la latou fautuaga, o le ala lea ua tatau ai ona fai sou manatu. O le faafitauli lea mai le tele o tausaga na faitioina e le atunuu, o le Komisi Suesue o sui o le Komisi Suesue; faapea mai e le lelei lava fautuaga ia e aumai leaga e tumu i tagata sa o i le palota, tagata na faiaina na omai lea i totonu taumafai e aumai o latou lagona i totonu e fau ai sueusuega a le Komisi. Atonu o le mea la lea, lea na tali nei, lea ua tali. Lea ua filifili e le Afioga i le Minisita aumai lava i totonu na o tagata e le i o i ni palota ia tau maua ni tagata e tutoatasi o latou lagona. O lea la ua tali ai lea faafitauli sa tomumumu ai tagata se i tulou. Lea la ua outou vaai ma outou silasila. E a la se tatou vaai i ai? E le na o le teena ae ua faaoga ma le isi upu, matua teena.

Ou te le faitioina lava Sui o le Komisi. Leaga foi a e avea se assignment, a e avea se mataupu ogaoga i ni tagata latou te faia, o le mea muamua lava, e te sailia tagata o lo o matua lava lo latou silafia i lea mataupu, with practical experience.

I le Lipoti lava ia a le Komisi i lona aotelega, ou te talitonu ana faapea o le Palemene a Niu Sila po o Ausetalia, ou te iloa e 100%. A o iinei lava ia i le tatou Palemene ma totonu o le atunuu o Samoa, ia, o lena ua outou silasila i ai e matua tele le feteenaiga ma le lē talafeagai. Aua foi e leai ma se sui o sui nei sa taamilomilo i tua i le itumalo i le ao ma le po e talanoa i tagata e leai se sui e talanoa nei oe ma le palota lea, ae o'o taeao vaai atu ua talanoa ma le isi sui tauva. E tele ma anoanoai faafitauli. Ae faafetai i le Afioga i le Minisita leai lea ua maua ma le lipoti na aumai, lea ua tatou tagai, o lona uiga la o le isi Komisi Suesue o lumanai ua tatou iloa foi. I lou lava talitonuga na'o a'u lau Afioga, sa ave i le Komisi Suesue talu ai ma le Komiti Faa-Palemene talu ai. Ou te le malamalama pe aisea e fai ai pea nei Komisi Suesue mai fafo o lea ua i ai le Komiti Faa-Palemene e faia le mataupu leni. Ua lava ma totoe i latou o lea ua paleni lelei Vaega Faaupufai. Aua foi o le mea lea tupu i tausaga e tele o le faitioga lava lea ua uma le fai o le Komisi, a o le faitioga lona lua o le tuai ona aumai o le Tulafono. E le mafai lava e le tatou Palemene ona faavavevave le Tulafono, aua foi e uma ona ave i le Komisi lea, aumai, Komiti a tatou toe taamilo foi le tatou Komiti. Ia, e uma le 2024 o taamilo. O lona uiga o le 2025 i le tausaga o le a lumanai le Palota faatoa aumai se suiga o le Tulafono o Faiga Palota. O lea la e i ai i le tele o tausaga, e oo lava i a tatou le Palemene e matua tatou le malamalama lava i le tele o mea. But o le process lea ua faatino.

Na saunoa le loia ia te a'u ina ua ou fesili i le fesili lea, fai mai, ia e manatua foi e tatau na tilotilo i le tutoatasi o mea nei o Komiti. Ou fai atu i ai, alu e vaavaai le Palemene a Ausetalia, Niu Sila, na e fai e latou Komiti Faa-Palemene mea nei. O lau la fautuaga ma lau tuualalo i le agai i le lumanai ua lava a le Komiti lea a le Palemene e faia, auai mai ai uma le atunuu ma o e taamilo ina ia vave ona faatino ma foia ai lea faafitauli. Ma le faaaloalo lava.

O le isi vaega lau Afioga e fia, mai lava i le amataga o tatou vevesi ai ma... lea na taua e nisi o sui usufono mamalu, o le mea lea o election petitions. Ou te avea pea leni mataupu i tausaga i Komisi Suesue uma lava. E matua lagona lou faanoanoa i nei mea, po o le a se auala e tuu ai. Ua na o le tatou pepese o

tatou o le atunuu muamua a le Temokarasi, tutoatasi Samoa, ae o lea lava e fai nei mea. A tatou vaai nei i palota ia na uma atu nei i Fiti, Niu Sila e uma loa uma, a o lea e fai e tatou e le gata i i ae toe o, omai toe fai i gatai. E feoloolo lou tigaina, leaga lea ou te fai atu ua faatolu na ou oo i ai lau Afioga. E feoloolo lou tigaina i le palota nai lo lou tigaina i le mea lea o le petition. A o le mea pito sili ona leaga lea ua tulai mai, o le alu lea o le tagata lea e tulua e molia oe ona faatalitali mai lea e alu atu e avatu se tupe e ave ai tua lana tagi. Ua tupu faafia le mea lea. O le matua solitulafono o lea mea. A o le mea lena lea e tupu i le lē mafai ona fofo o le faafitauli lenei.

I le Paeaiga talu ai na matua ave malosi a e le Komiti sa i ai ia fai se budget lea, pakeki, ma na matua lagolagoina e lo'u sui usufono. E lua options na ave e au ia i lau submission, afai e le mafaia le pakeki se i taumafai la e tuutuu i luga le threshold, le tupe e molia ai le tagata, it's an insult. E mataga le mea lea e tupu nei o le molia o oe i le \$10 po o le bbq faiaina ai. E le tatau ona toe tupu lena mea i se atunuu ua 60 ma ona tupu tausaga o tutoatasi. At least fai se tupe tele seia vagana ua oo i se \$1000 po o le \$2000 se tupe ua e faaogaina mo mea faapea ona agavaa lea i se moliaga. A o lenei mea o le molia o oe, ...ia le palota lea na uma atu nei, e i ai le sui na pau i le \$50, a o le tagata na alu atu nofonofu i lona fale i le aso atoa.

O mea ia lau Afioga, e tatau ona ave i ai le tatou faamuamua i le tatou Lipoti lenei i le tausaga lenei, i lenei foi Paeaiga lau Afioga, e taofi ai nei mea. E le faapea tatou te taofia le faatosina ma lou alu tufa tupe, leai e matua molia a oe. A o mea ia aua o le taimi lenei a sau le tagata i lou fale o mea masani o le meaai ma le pasese o mea na e fai ae a o'o i le taimi lea o le a lata i le palota ua corrupt practice le mea lea, ua bribery le mea lea. A o le mea lea e fai i aso uma aso uma, aso uma. O lea la le fautuaga i lau Afioga e auala atu i lau Afioga i le Taitaifono, ia se i tagai i nai options na ma tulaga ia ina ia aua nei toe tupu nei mea i le agai i luma.

O le isi vaega o le mea lea o le compulsory voting, e fou le mea lea...

FOFOGA FETALAI: Toe lua minute o le sui usufono.

Tofa LEALAI PULE RIMONI AIAFI: Ioe. Ia faatumau. Ma le boundary lea na iai nei, suiga lea... ia manatua o suiga tetele a ia na uma nei lea na fai nei i le Paeaiga lea na te'a nei. E le faigofie na matua luga lalo le Palemene, le fiafia le tele o sui usufono. Ioe, ae fai lava, faatino, taumafai e faatino ma agai i luma. O lau fautuaga, taatia lea mea ua i ai i lenei taimi, tatou tilotilo i le agai i le lumanai seia vagana le mea lea na o ai i Savaii tagata, taofi lena mea toe fai le mea masani. Leaga o le meataua ia palota tagata, faafaigofie.

Ona ou oo mai lea lau Afioga i le mea lea o le 10% nei te'i ua uma lo'u taimi, o le fesili lau Afioga. O le fesili muamua, aisea na le fautuaina ai e le Komisi Suesue le mea lea e taofi? Aisea? E faigofie lava le tali lau Afioga, e le faigofie aisea? E le maua ai se ai faaopoopo o Samoa i le aveese o le mea lea, na o le ai matua toese lava, ma o finagalo uma ia e faaalua i le 10% lenei lau Afioga, la e silafia na tatou i ai e le o ni mea fou. Na matua tatou talanoaina uma i options

ma mea uma nei na faia i na foi vaitau, leaga o le Faavae le mea. Na taamilo foi i Samoa atoa i le tulaga lea o le 10%. O lau fautuaga o le tele o manatu ia na aumai i le 240 lea ta'u mai e le Komisi faapea mai e pei ua taumauualoina ai tina pei ua faalumaina tina i le mea lenei o le sau i le mea lea o le 10%. E manatua foi o le mea lea ua leva na fai i Niu Sila same system lea e ta'u e tagata ia mo Listed MP's. Na sau lava le tamaloa foi lea o Winston Peters e le i malo i le palota, e sau i le Listed MPs sau a Sui Palemia. Ioe. A o le mea lea e saunoa ai nisi i le process le faatinoga o le palota, e matua leai a se faapea o i ai se faiga faapitoa mo nai tina e matua tutusa lelei avanoa e tauva ai tama ma tina. E tutusa uma a tatou e leai ni faiga faapitoa faapea e faafagofie le tauva a le tina ae faafaigata tama e leai e tutusa lelei a le tatou tauvaga lea e fai ma nai tina.

O le mea lea, o le igoa atoa o le Tulafono lea o le Temporary Measure o le mea faatoa faaoga pe a le atoa, ioe. Ae a oo ina atoa e le moomia. Ae se i vaai i ai i le silasila mai a Samoa ma le atunuu, 1,2,3,4,5, e na o le toaono lava nai tina e le atoa se toasefulu. O le palota talu ai ana le faaogaina i le palota talu ai e le atoa le toalima, ana le faaoga nei e le atoa le toaono. Na saunoa le isi afioga, Minisita, ia outou lagolago mai i le Afioga i le Tamaitai Palemia, ia outou lagolago mai. Lau Afioga i le Minisita, o le matou lagolago lena i le Tamaitai Palemia, aua le aveesea lea mea e le lelei, e le lelei e le maua ai se tatou ai aemaise le Afioga i le Tamaitai Palemia.

FOFOGA FETALAI: Ia, faamaea mai ua maea lou taimi,

Tofa LEALAILEPULE RIMONI AIAFI: Ioe... Lau Afioga, o au i le taimi lenei, pe e te fai mai ua lava, ua lava foi lea ua ta usitai ia te oe. Ioe. Ua ta fai mea popole foi i lau Afioga, ae le afaina faafetai. O le mea sili, viia le Atua, viia le Atua i lenei taeao, ua lava foi nai ia manatu, toe tuli i luma se ai. Le faafofogaaga a Samoa, a iai foi se upu ua laavale, e faamalulu atu.

Ae toe tasi a si mataupu lea lau Afioga ae le umi ona e...

FOFOGA FETALAI: Leai ua uma lou taimi...

Tofa Hon LEALAILEPULE RIMONI AIAFI: Ia se i talanoa la i tua.

FOFOGA FETALAI: Se i talanoa i tua le mea lena e te fia talanoa mai ai.

Tofa LEALAILEPULE RIMONI AIAFI: Ua e iloa? Ua e silafia le mea? Ia manuia le usugafono a Samoa.

FOFOGA FETALAI: Ia faafetai. Ia, ua maua le avanoa o se tasi o sui usufono.

Ia tulai maia le sui usufono mamalu mai Gagaifomauga 1 o se tasi foi o sui usufono matua o le tatou Maota.

Tofa Hon FAIMALOTOA KIKA IEMAIMA STOWERS-AH KAU (Gagaifomauga 1): E faatalofa atu i lau Afioga i le Fofoga Fetalai, faafetai tele mo le avanoa o lenei usugafono mai Salafai.

E momoli atu foi le faamalo a lenei usugafono i lau Afioga i le taitaiga o le tatou fonotaga aemaise foi taimi e siisii ai finagalo o sui usufono o lo o faapena... Ou te iloa e le faigofie le faafoefoeina, malo le galue.

E faatalofa aloaia atu i lau Afioga i le Tamaitai Palemia, lau Afioga i le Sui Palemia, le Kapeneta mamalu aemaise foi le saofaiga a Minisita Lagolago.

Taliu mai i lenei itu, e faatalofa i si o matou Taitai, lea ua toe Sui Taitai nei lea la e taitai lava i le taimi nei leaga o lea e le i sau le Taitai, aemaise foi sui lagolago o lenei Itu o lo o faapena ona agaia ma tuu atu le tuualalo i le tatou Faigamalo.

E faatalofa ma ofo alofa atu i le tapuaiga a Le Ao Mamalu o le Malo ma le Masiofo, tainane foi le faafogafoga tapuai mai a le Sui o le Fono a Sui Tofia ma le Faletua. E faatalofa atu foi i le Faamasino Sili ma le Ofisa o Faamasinoga.

E faafeiloai ma ofo alofa atu i le tapuaiga a si o tatou atunuu o Samoa i ona tulaga faalupe i mamalu faaleatunuu, o paia faale-Malo ae tainane paia faale-Talalelei.

E faatalofa atu foi i le faafogafoga tapuai mai a tatou uso i le Motu Sasae aua Tutuila ma Manua. E faapena foi ona ofo alofa atu ma faatalofa atu i le tapuaiga a Ofisa Sili o Pulega o Matagaluega ma Faalapotopotoga Tumaoti a le Malo, ua malo le galulue, ua malo le tautua atunuu.

E le gata i lea e faatalofa atu i lau Susuga i le Failautusi ma le Sui Failautusi ma le Ofisa o le Fono o lo o tautuaina le Fonousu a le Palemene. I le ma lau faatalofa faapitoa i le faafogafoga tapuai mai a si ou itumalo, i le paia lava lea aua le afifio o Sao e Fa ma Aiga Sa Umalau, le Atipouniu ma le Faasau le alaalatai o lau Fetalai i le Tulafale, lau Fetalai Lavea, o oe o le Alii o le Itu o oe o le Pule na mua i malae faapea le mamalu o le nofo a ituaiga ia Safotu. Si o matou nuu i Manase, e faatalofa atu i le afio o Taito ma ona Alo, Aiga Sa Umalau faapea le Fetalai ia Tauasa.

E faapitoa le faatalofa i le aufaigaluega totofi a le Atua i so o se fatafaitaulaga o lo o faapena ona nonomanu i totonu o le matou itumalo aua se manuia e le gata i le itumalo ae faapena Samoa atoa.

Ia tapuai maia ae se i taumafai sina tatou sao aua le Lipoti a le Komiti lea ua opea nei i le Maota. Lau afioga i le Fofoga Fetalai ae le i faia se faamatalaga e uiga i le Lipoti e fia faamauiina le agaga faafetai i le Afioga i le Taitaifono ma sui usufono mamalu uma o lenei Komiti i le fita o le galuega sa feagai ma latou.

Lau afioga i le Fofoga Fetalai, ua faafogafoga Samoa i le folasaga a le Taitaifono a lenei Komiti lea sa iloiloina le Lipoti lea a le Komisi Suesue agai i le Faiga Palota ua mavae atu nei 2021, lea foi ua taulimaina e le Maota kopi o le Lipoti ma ua tatou faitau malamalama ma maeaea i ai. Ma ou te manatu ai e le tele tele se folasaga o le a toe faia i ai aua o lea ua tele ina faaleo e le tele o sui usufono mamalu nisi o tulaga o lo o aofia i lenei Lipoti. Ae lau Afioga i le Fofoga Fetalai, o tulaga manino ua faaalua e le aotelega o sailiiliga a le Komiti

e tusa ai i le Lipoti ua na o sina vaega itiiti na mafai ona faaalua o latou finagalo i le Lipoti lea, le Komisi Suesue e aofia ai ma tatou sui usufono o le Maota, lea sa tatou o atu i luma o le Komiti. Ma e talitonu lena itu ma lena itu, ailoga na i ai se sui usufono na lagolagoina, a lea e fai mai le Lipoti na fulisia uma sui usufono sa oo atu i luma e teena i ona tulaga atoatoa faapea ai ma fautuaga na faatulaga mai.

E tele mafuaaga pei ona faaalua e le Komiti i lana Lipoti na mafua ai. Ae peitai, a ou toe tilotilo i le fautuaga a le Komisi e pei ona aumai i lana Lipoti, e le o le finagalo lea o le atunuu. E le o le finagalo lea o le atunuu pe a faatusa i le 205,000+ ma ono tupu le faitauaofai lata mai o le atunuu. Ae fai mai le Lipoti e na o le 2,175 tagata na faatalanoa i totonu o lea fuainumera. E 2,175 lea e aofia ai ma nai fanau aoga. E 687. Lau Afioga i le Fofoga Fetalai, e fia faamauina le popolega o lou nei sui usufono ina ne i te i ua tatou faia ni faaiuga e aafia ai le toe faatulai mai o nisi Tulafono, le toe teuteuina o nisi Tulafono aemaise o le Faavae e pei ona ua fautuaina mai e le Komiti le Malo e toe silasila i ai.

E pei o le popolega lena o lou sui usufono, ona o le laitiiti o tagata na faatalanoa a o lea o le a tatou agai e fai le faaiuga i le Lipoti lea. O le fesili a lou nei sui, e amiotonu ni faaiuga ma ni fautuaga o le a tatou faia a o lea ua faaalua manino e le Lipoti a le Komisi e le o se finagalo lea o le atunuu.

O le isi popolega o lena sui usufono lau afioga i le Fofoga Fetalai, afai na fulisia i le vaega toaititi na faaalua finagalo e teena le Lipoti a le Komisi atoa ma fautuaga na faatulai mai. Aisea na faaaau ai ona faatalanoa le Lipoti a le Komisi a o lea na fulisia e teena?

Lau afioga i le Fofoga Fetalai, o vaivaiga na o lou sui usufono ua folasia. Afai e talafeagai faafetai ae afai e leai toe faafoi mai, ae o le popolega na ua fesiligia. Lau Afioga i le Fofoga Fetalai, afai o se faaiuga e faaaogaina ni fautuaga o nisi o mataupu lea ua faapena ona faaaau e le Komiti le talanoaina e pei ona ua fautuaina i le Lipoti, e lagolagoina e lena sui usufono le tele foi o mataupu pei ona faaaau ai le Lipoti a le Komiti e faatalanoaina. Ia e pei la o le itumalo faaleaganuu ma itumalo faapalota. E ioeina e lena sui usufono le toe faafoi o le faatinoina o Faiga Palota a le atunuu i le vaevaega na aiaia faale-Tulafono o itumalo faaalalafaga. Aua e pei ona faaalua i le Lipoti a le Komiti, o le faiga lea e talitonu e maua ai le nofo lelei ma le nofo fealofani o le atunuu pe a faatino ana Faiga Palota ona o lo o maioio le taotoga o itumalo taitasi, pe a oo ina fonoa faapotopotoga e faia faaleaganuu ma le faamatai. Ma o se tasi lea o vaega na mafua ai ona fai mai lou itumalo ia te au, a e oo i le Komiti ia e faamau le teena e lena itumalo. E pei o se tasi nei o vaega autu na ala ai ona tetee le matou itumalo. E lagolagoina foi le toe faafoi ma le toe faatumau o le nofoa o Saleaula, o se tasi o Puleono i Salafai. E teena foi e lena sui usufono le toe faatu o ni sui

Tu Taulaga atoa ai ma le teena o le toe faaopopo o nisi o itumalo fou pe a faapea o le a tatou toe o i le mea e filemu ai le atunuu e pei ona fautuaina e le Komiti.

FOFOGA FETALAI: Toe lua minute o le sui usufono.

Tofa Hon FAIMALOTOA KIKA IEMAIMA STOWERS-AH KAU: Lau Afioga le Fofoga Fetalai, ona ou oo mai lea i le mataupu e tasi e teena malosi e lenei sui usufono. O le mataupu lea i le 10% o Tina.

Ou te muai faafetai i le matou Sui Taitai ona o ia o se tasi o sui o lenei Komiti e ana le Lipoti lea e faamau lona le lagolagoina o le soloia o le 10% o Tina. Pe a faitau i le Lipoti lea lau Afioga i le Fofoga Fetalai, e pei e contradict. Ou te le i manatua se Lipoti a le Komisi Suesue e soloia, ae o lea e faapea mai i le taunuuga o iloiloga a le Komisi Suesue na faamauina ai e teena le nofoa o 10% o sui usufono tamaitai i le tatou Lipoti lea e fai ai nei i ai a tatou soalaupulega. E 240 na teena. O le numera lea na faamauina ai lou popolega i le amataga ma lau fesili ou te fia malamalama ai. E le i tele sau suesue i totonu o le tusi tulafono e le o i i. Pe mafai e se fuainumera 240 ona iloilo ai se Faavae. O lenei 240 ou te talitonu sa fefiloai ai alii ma tamaitai. Ae ou te tatalo ma lou faamaualalo ma valuvalusia aa o le fau i le Maota nei, faamolemole ia faatumau le 10% o Tina.

Lau Afioga i le Tamaitai Palemia, lau afioga i le Sao Faapito, ou te le tau selu atu, e vaai maualuga mai tina ma tamaitai o Samoa o lo o faafogafoga mai i le tulai mai o lau afioga. O a ni Vaega Faaupufai ma ni tulaga faapolokiki ua e tulai mai o oe o le Tamaitai Palemia muamua o Samoa. O le vaai maualuga lena a Tina. Faamolemole, faamolemole, ia e alofagia le 10 pasene a Tina la e faafogafoga totoa mai. O le toatele o tina la e faafogafoa mai, ou te le taua o latou suafa, o augafaapae o le talalelei, o faletua o faifeau, o faafeagaiga, o le matou foi Ekalesia, e vili mai tamaitai sa o loo aoaoina fanau teine a le atunuu...

FOFOGA FETALAI: Faamaea mai le saunoaga a le sui usufono ua maea lou taimi.

Tofa Hon FAIMALOTOA KIKA IEMAIMA STOWERS-AH KAU: O le tatalo lena. Ou te talitonu sa e lotolotoi i totonu o le faatulai maiga o lenei Tulafono aua ou te ofi mai le Paeaiga Lona 16 ua i ai le fesuaiga lea. Faafetai, faafetai, faafetai pe afai o le a e talia le sao tele o Tina o Samoa e le gata o le tamaoaiga, totonu o aiga, totonu o nuu, totonu o Ekalesia, totonu o itumalo taitasi. A leai tina, ia e le function le faletele lea e i luma. Aua o le faletele lea e i luma pei ona tatou iloa o le mamalu o outou le itupa malosi, alii ma faipule. O le fale la e i tua lea e faaigoa ai o le...

FOFOGA FETALAI: Ua maea le taimi o le sui usufono.

Tofa Hon FAIMALOTOA KIKA IEMAIMA STOWERS-AH KAU: Faafetai i lau Afioga lea o le a faauma atu.

FOFOGA FETALAI: Lea ua manino lou finagalo. Ae o tatou Tulafono Tumau o lo o tulituli atu.

Tofa Hon FAIMALOTOA KIKA IEMAIMA STOWERS-AH KAU: O le tatalo lena. Le Maota o Samoa, faataua tina, faataua outou faletua, faataua alo teine o Samoa aua le agai i luma i le lumanai. O ai na iloa e toe tulai mai se isi Palemia Tamaitai pe a faapea o le a le finagalo o le Atua i le lumanai? Faamanuia i le Fono Aoa. Faamanuia i le Maota. Soifua.

FOFOGA FETALAI: Faafetai, se i tulai mai lau afioga i le Minisita o Soifua Maloloina.

Afioga Hon VALASI LUAPITOFANUA TOOGAMAGA TAFITO SELESELE (Vaisigano 2): Ia, ou te tulai atu faa-sui usufono faa-itumalo aua e moni lava e maua le avanoa o le Kapeneta ae le o faafofoga i ai Samoa.

O paia o Samoa ua taoto a o se alao'o, o paia i malae ma tupua e fia ua taoto lava i le Maota lenei. O le a le toe oo la i ai se tala a le sui usufono ne i faoa le taimi o le lauga, tatou te le lauga fevi'ia'i ne i faoa le anava a le tulī. O le aso lenei ma le mataupu i le Tulafono, tasi lea Tulafono sa le mafai ona moe ai le mafaufau. O se Tulafono taua, leaga o i e afua ai le manuia o Samoa.

Lau Afioga i le Fofoga le Fetalai, ona o le taimi e faatauvaa, ou te faafetai i le Komisi, o le Komisi o alo, o mamalu o le atunuu, o tupu ma ee, tamalii faitauina aemaise foi faletua ma tausī sa latou... Amuia outou, ua faitauina outou suafa ma tusia i faamaumauga a le Palemene lenei sa outou iloiloina ma faatauaina la outou galuega. E momoli le agaga faafetai. Malo tautua, faafetai le tauivi i measili.

I le Lipoti atoa ma le mafiafia sa tilotilo i ai, e ese le taua o mea sa lagalaga e le Komisi, aua foi e taua le latou Lipoti e faatonu ai le Palemene ma Samoa i le agai i luma. O le taua lea ia te au. O le ala lea o le to o le pulou ma faitau le agaga faafetai i le Komisi. O nisi foi sa avea ma faifeau o le atunuu, o Ekalesia aemaise foi latou na seei i tofi lelei ma mamalu o le atunuu. Ia lea foi ua... Faafetai. Malo i le Komisi. Aua ma outou ne i outou faitau o ita se isi ia te outou, pe afai e i ai ni o matou manatu agai i le Lipoti sa outou faia, lea ua outou faafofoga i le sui usufono o Vaisigano 2 e sapaapaia ma faatauaina le Lipoti ona ua avea ma taua, aua se lumanai o Samoa. Malo faafetai.

Faafetai i le Komiti Faa-Palemene, le Taitaifono i lau afioga le Sui Fofoga Fetalai. Malo faafetai. Faafetai i tupu ma ee, o tamalii faitau o le Maota lenei, o nisi o Toe Ulutaia. Ia tatou te le feseluai pei ona ou fai atu ne i faoa le anava

a le tuli, vaeatu le Maota ae malo mo outou faiva ma tiute. Faafetai e le faigofie le iloiloina... Ua faafia nei ona fai a tatou Komisi Suesue, o le mea lava lea tatou te vavao ai. E vevesi, avatu aumai, e i ai lava mea e tataua ona tapena. E le atoatoa. Ma e tatou te fiu e saili po o fea lava, e i ai se mea e atoa, e i ai lava mea e le atoa. E pei foi la ona tatou faitau i lenei vaitau i le Lipoti a le Komisi aemaise foi o manatu ma finagalo o le Komiti, o lo o i ai lava tulaga faapena. Ae ou te faafetai ona ua aumai se Lipoti maeaea e faatusatusa ai lagona o le Komisi po o finagalo po o tulaga e pei ona i ai. Ou te le talanoa la faapea ou te teena pe ou te... leaga e i ai le taimi o le Kapeneta ae na ona fautua ma faafetai i tulaga e pei ona aliai mai.

O le taua ia o le mataupu lenei o le 10%, ou te le fai atu la ou te teena pe ou te au i ai ae se i faaalua se manatu se taimi o le Fono a le Kapeneta, ae ese ma le taua o finagalo. Faafetai ua aumai o outou finagalo e faufau ai so matou manatu i le agai i luma ma lenei Lipoti ae taua ia.

E pau lava le mea e na ona toe tomanatu i ai, o nisi o tatou ua inaina e pei ua le taua tina. O la e sisila le Atua i tatou manatu ma lagona, o le mea lava lea na fanau mai ai Samoa, e pele ia te ia o ioimata o le tama le tuafafine po o tamaitai. E le faapea ua ita se isi i tina. Aua ne i faaseseina i lauga faapolokiki le mau lea, leai. A o le taua o le tatou iloa lelei o le tulaga e faafae ai le tatou tu ma le aga.

O le Maota lenei o le Maota o upu, o tala, o finauga o finagalo o suafa taua aemaise matai o le atunuu. Ae ou te faafetai i finagalo taua. E leai lava se finagalo e le lelei a o le taua lena o lea tatou te faalogologo i ai. E pau lava o lea sa ou faanoanoa ina ua tutulu si ou tuafafine mai le Alataua Sisifo. Pau le mea ou te faamafanafana pea i ai, aua ma oe lou matagitagi, leai o le tatou Palemene lenei e tatou faasoa. E pau lava le foi lele sa ou manatu ai i le tutulu a si ou tuafafine ma le tina mai Aleipata Itupa i Lalo, ae sa solomua ia oulua le aveese o le isi sui tina lea na tu mai. O le mea la lena e sili ona feteenai ai lou mafaufau, o le tou tausisi e lagolago tina, ae solomua ia tina le faaleaga o le isi tina i le Maota lenei o Samoa lea na ave i le Faamasinoga. Ae ana faapea la e moni mau na, e faamagalalo, e fetufaai, e milimili e le isi tina le isi tina.

Lau Afioga i le Fofoga Fetalai o lea foi e finau mai nisi o suafa o le tatou Maota... Leaga o lea ua faalava le...

Afioga Aliimalemanu Moti Momoemausu Alofa Tuuau (Alataua Sisifo):
Lau Afioga i le Fofoga Fetalai...

FOFOGA FETALAI: Malie lau Afioga i le Minisita se i tulai mai le sui usufono mamalu Aliimalemanu.

Afioga Aliimalemanu Moti Momoemausu Alofa Tuuau: E malie ma matagofie le saunoaga a le Afioga a le Minisita, ae e pei o lona ia finagalo faa-sui usufono, ae leaga ua taua lenei sui usufono ma si ou uso lea ma te sosoo atu ma faapea mai, ua ma toe aveesea le isi tina. E leai o le Tulafono i lalo o le

Faavae lea na ala ai ona i ai lea tulaga. O le Faavae foi lea na ma omai ai i totonu i le 10% ae ona ua ova na ala ai ona ave i le Faamasinoga. Ma le faaaloalo.

FOFOGA FETALAI: Ua i ai foi le manatu o le Nofoa o lea mataupu o le mataupu sa i luma o le Faamasinoga, e i ai foi le faateetega o le Nofoa e toe oo i ai ni saunoaga a le Maota.

Tofa Hon Laufo Fonotoe Nuafesili Pierre Laufo (Anoamaa 2): Lau Afioga i le Fofoga Fetalai...

FOFOGA FETALAI: O le mea lea e faamalulu atu i le tulaga lea, lea foi ua manino le tatou Maota.

O le mea lea ua tatou oo mai le tatou taimi malolo. E faataatiaese galuega a le Fono mo le malologa o le taeao. Oi, se i tulai mai lau Afioga i le Tamaitai Palemia.

Afioga Hon Fiamē Naomi Mataafa (Palemia): Lau Afioga i le Fofoga Fetalai ae le i tulai le Maota mo lana malologa, na ona ou fia soso atu ma le faaaloalo i lau Afioga i le alii Minisita ina ne i te i ua faapea, a feeseeseai tamaitai e le o se mea lelei. Ou te faamanatu atu, e feeseeseai foi outou. Ae pei a feeseeseai tamaitai ona fai mai lea ua agai le isi tamaitai i le... leai o le natura lava o tatou finauga. Ina ne i te i ua faapea aua o le mea a lea e tupu ia outou, a outou faia o le mea lelei ae a fai e tamaitai o le mea leaga. Ia tatou manatua le mea lena.

FOFOGA FETALAI: Ia, faataatiaese Galuega o le Fono Aoao mo malologa o le taeao.

Na faataatiaese Taulumaga a le Fono Aoao Faitulafono mo lana malologa masani o le taeao i le itula e 10:37 i le taeao ma toe amatalia i le itula e 11:07 i le taeao.

FOFOGA FETALAI: Ou te faasilasila atu ua toe amatalia nei Taulumaga a le Fono Aoao Faitulafono.

Ou te tapa ma le faaaloalo lau Afioga i le Tamaitai Palemia mo le lafo.

LAFO MO LE SUIA O ITULA FONO

Afioga Hon FIAME NAOMI MATAAFA: Lau Afioga i le Fofoga Fetalai, e tatou te faafetaia le Atua i Lana foai o lea ua tali le sua i le paia o le Palemene

ma ua i ai foi le talitonuga ua maua se faasiligamalosi e faaauau ai le tatou galuega.

Lau Afioga e pei ona e saunoa i le taeao ua sola, o faiga masani lava mo a tatou taualumaga i Aso Faraile e tolopo i le itula e 12 i le aoauli. O lo o i ai foi le faamoemoe e fia faamaea i le aso Fono lenei le galuega o lo o tatou tagofia nei. Ina ne i oo atu i le itula e 12 e le i maea felafolafoaiga a le Maota, o le ala lea ua ou tulai atu ai e faatu le lafo e faapea, *Ina ia faataatiaese Tulafono Tumau 32 mo le Suia o a tatou Itula Fono o le aso Fono lenei e faapea: Pe afai e aulia le itula e 12 i le aoauli nei ae le i faamaonia le Lipoti a le Komiti o lo o lauliliuina nei, ona faaauau pea lea seia maea ona tatou tolopo ai lea.*

O le lafo lea ma le faaaloalo i lau Afioga.

Faaluaina e le Sui Palemia ma le Minisita mo le Soifua Maloloina.

Na faamaonia le lafo.

Na toe faaauau felafolafoaiga i luga o le Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2023/2024 Nu.37, Lipoti a le Komisi Suesue o le Faiga Palota 2021, Fepuari 2023.

FOFOGA FETALAI: Ia, o le a faagasolo le tatou galuega e tusa o le Lafo ua faamaonia.

E faataatiaese a tatou galuega mo le malologa o lo o saunoa le Afioga i le Minisita mo le Soifua Maloloina i lona tulaga faa-sui usufono mai Vaisigano 2.

Ia, ou te tapa ma le faaaloalo lau Afioga e te tulai mai toe 3 ou minute.

Afioga Hon VALASI LUAPITOFANUA TOOGAMAGA TAFITO SELESELE: Faafetai mo le faasiligamalosi lau Afioga i le Fofoga Fetalai ma le Ofisa, malo tautua, faafetai ua taumamafa ma laulelei le Palemene nei ona o le taumafataga.

O le a ou le tali i faauilavea, leaga e i ai le mau a au nei, e talanoa loa le tamaitai, ou faaaloalo loa, ou te le tali la, vagana o lea ua faaopoopo le Afioga i le Palemia, ia, e le sili atu foi sau tala.

Na pau lava o lea lau Afioga i le Fofoga Fetalai, o le mea sa fia momoli atu i tamaitai o le Maota ma Samoa o lo o faafofoga mai, e le o faapito se vaai a le Palemene na o alii, o lo o tutusa lava avanoa tutusa. A tauva mai i le Faiga Palota, e le tau fai atu, aua o le mea moni, e toatele lava tamaitai sa tauva mai ma alii, na matua toilalo lava alii. E pei foi ona i ai nisi o tamaitai e tai toaono, taitoafitu le numera o alii sa latou tauva, ae na tulai mai lava e manuia.

O le isi mea ia aua ne i galo i tamaitai, leai o le alii foi ia, e lua mata se i tulou, e i ai lona isu, e lua lima, lua vae. E tutusa uma lava tatou, aua ne i faapea ua eseese i talitonuga faapea ua faapito se tala i alii ae faatuatuanai tamaitai.

Lau Afioga i le Fofoga Fetalai, e pei ona ou fai atu, e le talauina atua ni manatu o le Minisita leaga o lea e tu le loma e oo atu i le... a o nai fautuaga na ia

faalototele ai le tatou Maota, ia aua ne i tatou faasinoinolima faapea o tamaitai e a, o tina e faapena.

Na pau lava le mea lau Afioga i le Fofoga Fetalai na o se mau e tuuina atu atonu e taua, e pei la o felafolafoaiga i le Maota a o le tagata lea na sau i le 10% se i tulou, ua manatu e tautino. E tatau ona faatulaga mai po o le a le avanoa e lauga ai le sui usufono na sau i le 10% i lo le sui usufono aloaia o le itumalo. Afai la o se faataitaiga o le Tala o le Tupe ae lauga uma sui usufono ia o le itumalo i le Tala o le Tupe. O lona uiga, ua lua fofoga po o lauga a le itumalo e tasi i lo tatou itumalo o lea e taitasi tatou... E pei e tatau ona faatulaga faapena. A silasila i le saofaiga i tatou nuu i tua ma saofaiga a matai, ia e leai, e i ai lava matai e fai upu, e i ai foi matai e fesili atu i tua ma... ia o lou avanoa lea o le a e talanoa ai. A tatou o la i itu faapena, e tatau lava ona tatou tauave lava tulaga tutusa, a o eseese, pe afai la i lea tulaga, pe le fautuaina i leni taimi ona sui loa le faavae o na mea.

O le isi mea lau Afioga i le Fofoga Fetalai ia aua ne i galo, o mea nei mai fafo, le UN, a. E le faatonua mai fafo Samoa i lou lea talitonuga, e faatonu lava e Samoa Samoa. Ma o le mea lea e maua ai Samoa i lana tu ma lana aganuu, e fai lava e Samoa ana upu ma ana tala. Ae le tau faalogo tatou i atunuu i fafo, o atunuu foi ia e mitai mai o Initia ma Aferika ma... A outou silasila i ai, e le mafai ona faatusatusaina na atunuu ia Samoa o si tamai atunuu, e ola i lana aganuu ma lana tu ma lana aga.

Lau Afioga i le Fofoga Fetalai, o mea na ia tatou aloaloese, aua ne i faatusatusa atunuu tetele nei e tai fia piliona ma fia miliona tagata, ma Samoa e le i atoa se miliona. O lea lau Afioga i le Fofoga Fetalai, o lau lava mau ma lau talitonuga, o le tu ma le aganuu faa-Samoa e faatonu ai lana tu ma lana aganuu, e afua mai lava i totonu o Samoa.

Ia ona faapea lea lau Afioga i le Fofoga Fetalai, o le tele ia o manatu. Leaga le mea e manaia o le lelei... E pei ona fai atu sa moemiti ina ia oo mai leni Tulafono ae ui ona o lea ua faalava le amoa ona o taimi faatonuina.

Ia faaii sau tala, faafetai ua tatou toe feiloai ma le Afioga ia Leala le sui usufono o Faleata, malo faafetai le toa Leala. Sa ou faapea o le a e tu mai i luga nei e faatoese, e te faatoese mai ia te au sa Taitaifono ma... ae peitai, leai o lea sa ta talanoa anapo, faafetai. Malo. O le mea sili, o le fautuaga, ia amata ona e faataitai ia Mauu ma le Afioga ia Ale ma sui usufono mamalu, ae alu ese loa ma mea sese ae faatino mea lelei.

Lau Afioga i le Fofoga Fetalai ae ou te le i nofo ifo i lalo, o le taua ia o lau faaape anapo ne i meaane ua le lavea i se lauga, o i faatoa ou iloa ai, matou sa i ai, e fai lau ausiva e puipuia lau afioga. E ese le matagofie. Faafetai i le Failautusi ma le Sui Failautusi. E le o ni upu avane ai, ae ua ou vaai i le fiafia o tatou malo mai fafo anapo, ua oo lava ina sisiva ua uma le pese o la e sisiva lava. Tailo ne i te i ua le matauina e le Sui Palemia leaga o lea sa taumafa lana fagu, a o au lea ou te malamalama lelei, e ese le manaia o le fiafia anapo. Faafetai ia Leala ma si ou uso foi mai Vaimauga, aemaise foi o matou ma Minisita sa i ai, e ese le taua. E ui lava ina i ai a matou teutusi sa tuuina mai e nai malo, ia ua misi uma e outou lea manuia. Ae faafetai tele staff, faafetai i

malo le... e ese le matagofie aemaise foi o taumafa sa gaosia lava e le Ofisa. Ia e momoli le agaga faafetai.

E le uma le fia talanoa i le Tulafono, ae aua tou te popole tamaitai, na ona avatu o lagona e puipei ai ma faafetai i le Komiti, faafetai i le Komisi. O mea uma o mea lelei, ae faaatoatoa mea e le atoa ma faalelei mea e fia faaleleia atili.

Ia ae malo i le Taitaifono le lototele. Aua foi e te ano oe i upu la e aumai ua vaelua lava e oe lou itumalo, a o 'ai na o mea o tofi. Ae faafetai. Manuia Samoa, manuia le Maota.

FOFOGA FETALAI: Ua faamalo faafetai saunoa i lau Afioga i le Minisita o le Soifua Maloloina, ia po o lau Afioga foi i le sui usufono mamalu mai Vaisigano 2.

Malo mo le faasoa faa-Tama Matua foi o le Maota aua le faafofoga a le Maota ma le atunuu i le tauavagameaina o le faamoemoe o le Komiti ma lana Lipoti. O le mea malo faafetai. Faafetai mo lou sao.

Ia, o lea ua fou mai le sa o le Tama Matua o Faasaleleaga 4. Lau Afioga i le Tama Matua Tea Peato.

Afioga TEA TOOALA PEATO (Faasaleleaga 4): Lau Afioga i le Fofoga Fetalai, se ua ou manao e sosoo atu au ma le Afioga i le Minisita, la'u Minisita. Ua fia faaauau atu foi le ma... Faafetai i lau Afioga mo lenei avanoa foi ua... A o lau tulai atu ma lou agaga e tumu i le faaaloalo, ou te fia manao e faatu se lafo, ae aumaia loa le fesili ma tatou malolo.

O le ala lea o lou tulai atu ma le agaga faaaloalo, aua ou te talitonu lava, ua autasi uma lava le mamalu o le Maota lenei e talia le Lipoti a le Komiti. Ou te manatu la, o lou tulai atu foi, ou te lagolagoina foi. Ae ui i lea, ina ne i le talia lau lafo lea e tau faatu atu, ae o le a taumafai atu nai manatu laitiiti lava lau Afioga i le Fofoga Fetalai.

E ese le taua i lou sui usufono o le Lipoti a le Komisi sa iloiloiloina le tulaga o le Faiga Palota. E ese le taua o lea... ae ou te faamalulu atu, o le tele ia o le Lipoti, ae laitiiti lava si vaega sa mafai ona ou faitau ai, ona o le mafuaaga, ua fai si vaivai o lau vaai lau Afioga i le Fofoga Fetalai.

Ae o nai vaega sa mafai ona oo i ai lau... i le amataga o le Lipoti a le Komisi, e ese le taua i lau faitau atu i ai, ma e ave lau faafetai i sui usufono mamalu uma o le Komisi sa latou lauliliuina le tulaga o le Faiga Palota. Ua ou mafaufau, o le tele ia o le sao o le Komisi. Maumau pe ana mafai ona ou faitau ai i le Lipoti atoa. E ui i lea, o la e ou te teua lelei lava i lou fale, a maua sou avanoa ou toe matamata i ai vaeane le paia o le Maota.

E oo foi la i le Lipoti a le Komiti sa lauliliuina le Lipoti a le Komisi, e le i lava foi se taimi na ou... ou te faamalulu atu lava i le tau atu o lea vaega, ona e fai si vaivai o lau vaai. Ae ua ou faapea, o lea ua aoatetele mai e le faaiuga a le Komiti le Lipoti a le Komisi. E ui lava ina o lau matau i ai ua aveeseina le tele o isi vaega ma ua le lagolagoina e le Komiti, pe a ma le 80 pei ona maua i le saunoaga, ua le aofia i le lagolagoina o le latou Lipoti a le Komiti. E ui lava i lea, ae ua ou lagona lava le agaga faafetai ona o le taua tele.

Ou te mafaufau, e ave lou mafaufau i le taimi o le palota lenei na tatou vevesi ai nei, i le maea o le palota lea na tulai mai, e le o po se lilo i le mea na tulai mai. O faafitauli na feagai ma le tatou atunuu, e le o po se lilo, ma e leai ma se sui usufono mamalu o le Maota lenei na te le o matauina lena mea, e oo lava ia i tatou uma lava. Ae ou te faafetai ua toe taua mai lava i le Lipoti lea, e pei lava ona ou fai atu na ou faitau i se vaega o le Lipoti a le Komisi, o le aumai o le taua o le Lipoti lea, o le taumafai maiga o le faaofi mai o le tatou sa, ina ia mafai ona folau le tatou... ma tulai mai le tatou Faigamalo. Aua o se mea faigata tele, e le i faigofie. Ae na ou matauina lava le aumai e le Komisi o le Faavae, e 45 aso e ao ai ona faatauto le Palemene, 45 aso. E matauina ma le... le 45 aso lea, oka se faigata, o lena tou te matauina, e matauina e le atunuu atoa ma le mamalu o le Palemene. O lou foi toeaina sui usufono, sa nofo i lena aso ma le... ou te le toe fia manatua e au. O lea na maua lava i si fasi fuaitau a le Komisi, e ui lava ina e le i auai le Afioga i Le Ao Mamalu o le Malo ma le Sui Ao, ae na faataunuu lava. Ioe. Ua toe tomanatu lou sui usufono, ana le taumafai mai la le faataunuuina o le 45 aso lea e ao ai ona faatauto le Palemene, e le see le tatou sa, e le malaga le tatou...

O le ala lea o lou tulai atu e faafetaia, faafetaia le Komisi. E matua maoae lava le toe fafagu mai lou mafaufau o le mea na tupu i lea aso. Atonu e mama i finagalo o le Palemene, a o lou sui usufono matua, na matua lagona lava lou... ae ui i lea, se faafetai, ou te faafetai ona o lea ua see le sa, ua alu, ua le o toe taofia. O lea ua alu. Ae faafetai i le alu lea ua alu ai, ua le o toe... e le mafai... O le mea ou te faafetai ai, na amata mai le tau faaofiga mai o le tatou sa ina ia alu le Malo o le atunuu, folau. E tulai mai e 26 sui usufono, 26 sui usufono. Na pau lena o sui usufono sa faatautoina i le aso lea e tauave le Palemene o le Malo o Samoa. E fia sui usufono lea ua i ai nei? E fia lea ua i ai nei? E 35. Ona ou faapea lea, faafetai i le Atua, faafetai i lou faatasi mai. Ioe.

O le ala lea o lou tulai atu lau Afioga. Ou te matua faafetai, ou te faafetai ma vivii i le alofa o le Atua ua see le sa, o lea ua tatou folau. A o lau la matau i le folauga lea ua alu, ua le o toe... ua alu, ioe. Ona ou toe mafaufau ifo lea i le isi vaega lea ua tulai mai i lou mafaufau, o le Atoa o Samoa. Ioe. Ou te manatua lava lau lauga iinei, lau lauga i le tausaga lea na tea nei, se ua ou te i i le... sa taumafai le pemitā o si o matou aiga e malaga i le faalavelave sa fai. Ua fiu e taumafai se pemitā. Ona te i lava lea ua... e fai lau lauga lea o toesea le Afioga i le Palemia i fonotaga i fafo. Ou te iloa o la e silafia e le Sui Palemia. Na ou fesiligia lea, ua 61 tausaga talu ona tutoatasi e Malo o Samoa, aisea e faapenei ai le taumafai? Oka se faigata o le tau o atu o... o le taimi lava lena na tulai ane ai le Sui Taitai, le Tofa ia Fonotoe, na tulai ae ma lagolago lau taumafai atu. Ioe. Fai mai lana saunoaga, e sao le mea lea e saunoa ai le Tama Matua lea. Ua leva ae leai se... na faamo'i mai i lau... O i ina na ou faatu ai loa e taitai, ou fai atu, taitai loa oe aua ne i e toe Sui Taitai. Ioe. O le mea la ou te fai atu ai, o lea ua ou faalogo atu ua toe Sui Taitai, a o lea na ou fai atu e Taitai. O la e faa...

O le mea ou te fai atu ai lau Afioga i le Fofoga Fetalai, ona uma lea o le fonotaga lena i le tausaga lea na tea atu nei ou alu i Savaii ou nofonofa ai, ae ou faalogo mai ua alu le malaga, ua masii le malaga a Samoa, le Afioga i le

Palemia, le Sui Palemia ma le mamalu o le Kapeneta ma lau Afioga ua masii. Ou faapea, auoi, sole, o lau lava tala na fai alii, a o lea ua amata. O le ala lea o lou fai atu, sole ua tatou folau. O lale ua maua mai, e ese lou fiafia i le mea lea ua i ai le Atoa o Samoa. O Tutuila ma tatou e tasi, ae aisea lava ua faigata ai? Aisea lava na tuai ai ona fai ni fesootaiga lelei? A lea ua tu, lea ua tulai mai. E tasi lea vaega ou te faafetai ai ma ou lagona ai, leai o le finagalo o le Atua e ao ona tatou faatasi, e tataua ona faatasi Samoa. E ui ina eseee Pulega ma Faigamalo, ae tino e tasi. A lea ua matua mafana lava i le taimi lenei. O lea ua ou matauina, aua ou te le i ai lava au i ni tou mafutaga ma Amerika Samoa ou te nofonono mai lava i Savaii ma ou... sole, ae ese lou mimita o au.

FOFOGA FETALAI: Toe lua minute o le sui usufono.

Afioga TEA TOOALA PEATO: Oi faafetai. Ua ou sela. O lau tala lea lau Afioga ona ou faatu atu loa lea ma le lafo, *Faamolemole, aumaia le fesili, ou te fia alu i Savaii nei. Aua le toe... faamolemole.*

O le tatou Palemene, se faafetai i le alofa o le Atua. Ou te manao ia tatou faatasi, aua ne i toe fetusitusia. E ese lou fiafia i le tatou mafutaga. Ioe. Se lau Afioga i le Taitai, ou te le toe taua atua se Sui Taitai. Lau Afioga i le Taitai Fonotoe ma lena Itu o le Maota, omaia tatou galulue faatasi, tatou opogi faatasi le tatou Faigamalo, ave i le Atua. Ia manuia le tulai mai. Ou te talitonu lava au, o le tulaga lea ua tatou i ai, o le finagalo lea o le Atua, o le finagalo lea o le tatou atunuu, o i tatou faatasi uma lava, ia maua e i tatou uma le agaga o le fealofani.

Lau Afioga i le Fofoga Fetalai, faamolemole e talia mai lau lafo. Ia manuia tele lava lau Afioga i le Fofoga Fetalai. Lau Afioga i le Tamaitai Palemia, se e ese lou faateteina pe a e saunoa mai sole. Oka se manaia o au saunoaga. O lau tala sao lava. Se e te saunoa loa ou faalogo atu, oka, manaia. O au e leai sau TV leai sau... ae ou te valaau i lau fanau, aumai, aumai la outou leitio se i ou faalogologo. Faafetai i lau Afioga i le Palemia aemaise le Sui Palemia. Malo. O outou mama na.

Le paia e o a outou Afioga i Minisita, aemaise lava lau Minisita lea se... se aua e te toe maitaita pe a ta talanoa, ia e alofa... Ia, tuuaia ia lau tala lea o le a fai atu. Ia manuia tele lava le tou Aiga Minisita, o outou mama na. E ui lava i le fesuiaiga ua i ai nei... oi na sui atu loa le Minisita o Tupe ou tagi, o lou alofa ia i le Minisita o Tupe ina ua sui, ou faapea po o le a le mea ua tupu. Ia ae emo ane le ata, se ua fiafia lava le Tamaitai Minisita. Faafetai.

Le paia e o le tatou aiga i a outou Afioga, ia faamanuia le Atua. Ia manuia foi le... Oi sole! Talofa e se i le tapuaiga a... ia manuia outou. A uma loa le Fonotaga lenei, aua tou te malaga mai, o lea lava ua mafai ona outou faafofoga mai outou Ofisa ma le tou tau omai fua.

Lo outou paia, o i ai ni mea faalogologo tou te... aua tou te tau malaga mai outou pe a uma le fonotaga lenei faamolemole. Ia o lau poloaiga lena mo outou i le vaiaso lenei faamolemole. Ua lava a le tou faafofoga mai i mea ia e tuu i outou taliga vaeane lo outou paia. Aumaia le fesili.

FOFOGA FETALAI: Malo ua maea lou taimi. Malo. Ia, malo foi i le saunoaga i lau Afioga i le Tama Matua lau Afioga i le Matua Fetalai. Malo le faasoa o lea ua maua lou agaga faa-Tama Matua. Malo lava mo fautuaga ma saunoaga.

E i ai se... ua uma ona e lauga.

Afioga Hon Lautafi Fio Selafi Purcell (Satupaitea): E leai ou te le lauga, ou te tulai atu e faalua le lafo a le Tama Matua leaga o maua e fia o i Savaii nei i le vaa o le 2 lau Afioga.

FOFOGA FETALAI: Ia, e faamalulu atu foi i le lafo, ona e toeitiiti lava maea tatou mataupu. E manatu foi ne i i ai lava se finagalo o se itumalo e taoto i tua, leaga e taua tele lenei Lipoti aemaise o tatou faiga filifiliga. O le mea lea, e le o toe mamao.

Ia se i tulai mai le sui usufono mo Faasaleleaga 2. Oi, ia, tulai mai la le sui usufono o Aana Alofi 1.

Afioga FESOLAI APULU TUSIUPU TUIGAMALA (Aana Alofi 1): E muamua ona faafetai i lau Afioga i le Fofoga Fetalai mo lou avanoa. Ae avea ia lenei taimi efaatalofa atu ai i lau Afioga i le Fofoga Fetalai, faapea foi le Afioga i le Tamaitai Palemia, le Sui Palemia ma le mamalu o le Kapeneta.

E faatalofa foi i le paia maualuga aua Minisita Lagolago e faapena foi lenei itu i lau Susuga i le Taitai aemaise o sui usufono o tupu ma tamalii o le atunuu.

Ou te faatalofa foi i le maualuga i Ofisa Sili o Pulega o Matagaluega o le tatou Malo. Ae ou te faatalofa foi i le paia maualuga, aemaise foi o le aufaigaluega tofofi a le Atua i so o se fatafaitaulaga i totonu o Samoa nei aemaise foi o atunuu mamao.

Ou te faatalofa foi i le paia maualuga aua le faafofoga tapuai a Le Ao Mamalu o le tatou Malo ma Lana Masiofo. E faatalofa foi i le paia maualuga aua le Sui o le Fono a Sui Tofia ma lona Faletua.

E faatalofa foi i le paia maualuga aua le afio o le Faamasinoga Sili, le Afioga i le Peresetene ma le mamalu o Faamasino o le Faamasinoga.

Ae avea ia lenei taimi ou te faatalofa ai i lou itumalo o Aana Alofi 1, aua le latou tapuaiga.

Lau Afioga i le Fofoga Fetalai, e i ai le manatu maualuga i lenei aso, sa ou nofonono lava pe fai se tala a Aana Alofi 1. E i ai le manatu maualuga e le o lavea lava Aana Alofi 1 i le fesuiaiga o itumalo aua e i ai le manatu maualuga o lo o sologa lelei mea uma. A o le agaga maualuga i lenei vaega o le aso, e fia momoli le agaga o le faafetai tele i le paia maualuga o le Komisi i le latou vaega o le suesueina aua lenei mataupu. E momoli atu ai le agaga o le faafetai tele i tupu foi ma tamalii o lo o latou tauaveina le Komisi Suesue aua le Faiga Palota.

E momoli foi le agaga faafetai i lau Afioga i le Taitaifono ma le mamalu o le Komiti aua le lauliliuina o le faamoemoe aua foi lenei Tulafono e tusa ai ma taualumaga o le tatou Fono. E leai se manatu maualuga na o le agaga o le faafetai ma lagolago i lenei faamoemoe. O le agaga maualuga i lou itumalo ona

o lo o taoto pea lou itumalo. O le mea lea ou te faafetai ai i le Komisi ona e le o aofia lou itumalo o Aana Alofi 1 i le vaevaeina o itumalo, o lo o taoto pea Aana Alofi 1 i le mea o lo o i ai. O le mea lea e momoli atu ai le agaga o le faafetai tele o lo o sologa lelei foi lou itumalo ma o lo o taoto foi i tulaga o lo o i ai lenei Paeaiga.

O le agaga maualuga o le lagolago i tina ma le 10%, o le agaga maualuga sa matou auai pei ona i ai le Fofoga Fetalai ma nisi foi o sui usufono i fonotaga i Chana i Aferika, o le agaga lea sa i ai, sa faataua le sao o tina i totonu o so o se faigamalo. A o le agaga maualuga o Aana Alofi 1 i lenei vaega o le aso, o lo o i ai le lagolagosua i le faamoemoe o tina, e tatou te aia tutusa aua se faamoemoe po o se Faiga Palota o lo o faapea ona tatou aia tutusa i ai tama ma tina aua le Faiga Palota.

O lou la manatu i ai, e le faapea ua ese le aia a tina ese le aia a alii. A o le agaga maualuga, a i ai lava le matai, pe fia sao mai tina i totonu o le Faigamalo po o totonu o le tatou Palemene, o la e i ai auala e pei foi ona tatou ui mai ai tatou, e tatou te o e tautua le nuu, tautua i afioaga, o Ekalesia ma mea faapena. E pei a o upu a le Tusi Paia, a i ai se isi e fia muamua, tautua, auauna. E faapena le lagona o lou sui usufono ina ia tatou saofaga i le faamoemoe lenei ina ia aia tutusa uma i ai tatou tama ma tina aua le faamoemoe lea o le Faiga Palota ma tulaga faapena.

Ona ou se'e mai lea i tulaga e pei ona ou lauga ai i le taimi o le lauga faataupou i le faapalotaina lea o tagata mai fafo, i tatou atunuu i fafo i nisi foi o papaa ma... Ia, e i ai sou lagona maualuga e pei foi ona talosaga i lena vaitau ma lena taimi ina ia fai se fuafuaga ina ia palota ai o tatou tagata mai fafo. Ia lea sa taoto atu lava i le Afioga i le Tamaitai Palemia ma le tatou Faigamalo aua ia fuafuaga faataatitia aua se lumanai e tauia ai le agalelei ma le tamaoaiga o lo o tatou aeaieina aua tatou atunuu mamao.

E pei o le mea lea e momoli atu pea, taoto atu pea i lau Afioga i le Taitaifono ma le mamalu o le Komiti ia fautuaga i ia tulaga. Ona ou se'e mai lea i le agaga fiafia ma le agaga faafetai i lenei vaega o le aso, e momoli atu ai le agaga o le faafetai tele i lau Afioga i le Taitaifono ma le mamalu o le Komiti ma le mamalu o lenei aso.

E matua lagolagoina e lou sui usufono o lou Itumalo le faamoemoe ma le tala a le Komiti ma le latou saunoaga aua se lumanai manuia o Samoa mo a taeao. O se tala puupuu lea, e manatu o lea e tuli tamo'e le tatou taimi ma le faamoemoe. Ae o le agaga maualuga ia agalelei mai le Atua i lenei aso. Faamanuia i le Afioga i le Taitai o le tatou Malo le Afioga i le Tamaitai Palemia. Ia agalelei foi le Atua i lau Afioga i le Fofoga Fetalai, faamanuia foi i le tapuaiga a le Maota nei, agalelei foi i le tapuaiga a o tatou aiga i atunuu mamao, tina matutua ma tama matutua ia i ai le agalelei o le Atua.

Faamanuia mai le Atua i lenei aso i Matagaluega a le Malo aemaise foi o le tapuaiga a Samoa i ona tulaga faalupeina. Ia o se tala lea a Aana 1 i lenei vaega o le aso ma le agaga faaloalo. Manuia le Fono.

FOFOGA FETALAI: Malo faafetai, malo saunoa i le sui usufono mamalu mai Aana Alofi 1, malo lava mo lou sao. Aua le faapopoleina le tatou Maota i le tatou taimi, o lea ua i ai le tatou Lafo, i nei tei ua faapea mai le atunuu ua tatou faatopelau le tatou galuega. E leai, o lea lava ua i ai le Lafo ua taatia i le Maota, ia afu lelei a outou saunoaga mo le 15 minute.

Ia tulai mai se tasi o sui usufono. O lea ua matau atu, oi, ia se i tulai mai le sui usufono mo Sagaga 4.

Afioga TAGALOATELE PASI POLOA (Sagaga 4): Faafetai lau Afioga e tusa ma le avanoa, e faafeiloai aloaia atu i lenei vaega o le taeoa i le afio o le Afioga i le Tamaitai Palemia, Sui Palemia, afifio foi Minisita o le Kapeneta, afifio Minisita Lagolago.

Ia, faapea foi le afio o le Taitai o le la Itu o lo o Agaia le tatou Malo, faapea sui usufono. E faafeiloai atu foi i le mamalu o Matagaluega e pei ona tatou mafuta i lenei taeao.

E faapea foi ona i ai le agaga i lenei taeao lau Afioga i le Taitaifono, e avea lenei avanoa se i faafeiloai atu ai i si ou Itumalo o Sagaga 4 i le afifio o Aiga e Tolu, Tama Alosina, Alo o Malietoa faapea le faautautaga ia Lutua. E faapea foi ona faamaise atu i le lagia o Falesoa aua le valaau a le Atua i le Tama ia Tavō Ivala, o sē ua tusi matua foi i upu o le matou afioaga. Ia alofagia e le Atua, maua le lototetele, o le Atua lava e pule aoao i lana faasoasoa.

Lau Afioga i le Fofoga Fetalai, e manatu e fia fai se sao o lenei Itumalo e tusa ma le Tulafono ua faataatia i luma Maota o le tatou Palemene. E matua lagolagoina e lenei Itumalo vaega uma e pei ona tuuina mai. E manatu foi na o ni nai vaega o le a mafai ona ou oo i ai, e fautuaina ai fautuaga ai le Komiti e pei ona faataatia mai.

A ou vaavaai i le Komisi Suesue sa o latou suesueina lenei lava Tulafono, e lagona le faagaetia i le matagofie ma le agavaa o i latou o ē sa tofia i lea Komisi. O tagata ua lava le silafia i tulaga o le poto salalau faaneionapo. Ae le gata i lea o i latou o ē sa galulue i le galuega a le Alii ua latou aumaia le fautuaga e tusa ma le faamoemoe o le tatou Malo.

Ou te faamalo foi ma ou faafetai i le Komiti Faa-Palemene e pei ona i ai la latou faaiuga ua mafai ona talanoaina i lenei taeao. O le vaega muamua lau Afioga e fia oo i ai sa matou faamatalaga, ona o le faamalieina i le vaevaeina o Itumalo faapoopoo o le taulaga. O se vaega lea e sili ona taua e pei lava ona silafia i le tele o afioaga o le tatou atunuu ua to'agaogao lava. Ua lilifa mai le finagalo o le toatele o le atunuu i totonu o le taulaga ona o i latou o lo o galulue ma tautua i le tatou atunuu e ala i o latou valaauina ae o i latou o ni tagata ua lava le aoaoina.

Ou te talitonu foi, o tagata ia e sili ona atamamai, tulou, i totonu o vaega ia o le taulaga ua vaevae i ai. E pei lava ona faataatia i le faataatiaga a le Komiti, e ese le matagofie o le faataatiaina, Itu Taulaga i Sasae ma le Itu Taulaga i Sisifo faapea foi ma le Ogototonu. A ou vaavaai i tulaga na i ai Paeaiga e lua ua tuanai atu, Tu Taulaga i Sisifo faapipii ia Sagaga le Usoga, o'o i lenei vaitaimi ua

faapipii agai ia Leauvaa faapea foi isi fesuiaiga. Ae faafetai o lea ua ou talitonu i lea suiga ua taatia mai e le Komiti, ou te iloa o se mea taua lea.

Ae na pau lava le fautuaga se i silasila toto'a le tatou Komiti i le taimi e filifili ai ni sui mai vaega ia ua uma ona fuafuaina, ina ne i avea le avanoa ma ala e tei ai ua sui mai le Matai mai le tatou motu i Savaii, sau lava lea nofonofo i i ona o le fia tamo'e ai i i e lelei e faigofie. Ae a silasila le Komiti i ē sa'o lava e tatau ona agavaa, i latou ua mautu i totonu o ia nofoaga ua agavaa ai le tauva, i latou o ē ua latou umia saoloto ni fanua. Ae le o i latou o ē na malaga mai fafo ona vaai lea o le fale mautotogi e nofo ai ona o le fia tauva i i e faigofie pe a ua silasila atu e le au lona Tootoo i le tele o i latou o lo o latou tauva mai. Ona pau lea o le fautuaga agai i lea vaega lau Afioga.

Ona ou oo mai lea i le vaega e pei ona i ai le faasalaga o i latou o ē sa tauva ae toe faaui i tua ina ua i ai ni faaletonu. Ou te lagona o lea faatoa faataatia Tulafono e tatau ai mo ia vaega. Ae o lou talitonuga ua matagofie lea fuafuaga ona o lea foi sa tupu i Faiga Palota e pei ona tuanai atu, e faaletonu loa le silasila a le isi Sui Tauva e aafia, ona faamavae lea, ae mulimuli ane e manatu e toe tauva mai. A o lea ua matagofie le faataatiaga o le Tulafono e mafai ai ona le toe agavaa pe afai o le a faamavae ae ua uma ona manumalo mai le Nofoa o lea Itumalo.

I le tulaga lau Afioga i pasene o i latou o e mafai ona toe fai ni tagi e faasaga i le ua manumalo, faafetai o lea ua sui mai le 50% i le 75%. O lou sui usufono ou te manatu e oo lava i lea 50% ua matua tele lava mo i latou o e limavaivai, fuafua agai i ai sa latou taumafaiga. Ae seasea lava... o le tele lava o Faiga Palota e 80% le manumalo e le taitai i ai le fuafuaga e pei ona i ai. Ae faafetai o lea ua i ai le fuafuaga ae o le tatalo, ae a pe a tumau ai i le 50% e mafai ai e le sui faiaina ona toe taumafai ina ia natia lea vaega, aua pe a vaavaai atu lo'u sui usufono o lona uiga o le tagata e lava le tamaoaiga, e taumafai lava ina ia mamao le va ina ia aua ai nei mafai e le isi Sui Tauva ona taumafai mai pe afai na te le ausia le 75% ua faataatia i le Laulau-a-Fono i lenei vaitau.

Lau Afioga i le Fofoga Fetalai ona ou oo mai lea i le vaega pei ona tapisa ai le tatou fonotaga e uiga i le 10%. Ia e moni lava nisi o Tootoo, i tulaga o le tatou vaavaai i mea o tutupu i le tele o atunuu. Ia a tatou faatusatusa o le tele o atunuu e le talia ni tamaitai i totonu o le Palemene. Ia o nisi o lea faatoa faaofi atu le talia o tamaitai. Ae o le tatou atunuu, e leai. O lo o i ai foi lo'u talitonuga e i ai se Paeaiga e oo mai ai ua tutusa Tina ma Alii ia i latou o ē manumalo mai. Mo le taimi nei e le o i ai se fuafuaga a le tatou atunuu e taofia aua o lo o i ai le faatapulaa o le maualalo ae leai se faatapulaa o le maualuga. O se vaega lea e sili ona taua. O le ala foi lea e malosai ai se lagona o le sui usufono e i ai le taimi e pasia mamao ai pe o le isi Paeaiga lea lumanai le iloa pe sefulu+ tamaitai e ui mai lava i le faitotoa lautele ma le matagofie. O tulaga e pei ona i ai, e lagolagoina le tulaga ua oo i ai le faatulagaga a le Komiti mo ia vaega.

Lau Afioga i le Fofoga Fetalai, e manumanu e tusa ma le faamoemoe o le tatou polokalama mo lenei aso ona manatu lea ua faagata se lagona o le sui usufono. Alofagia e le Atua lau Afioga i le Fofoga Fetalai i ou tiute tauave, faamanuia i le Afioga i le Tamaitai Palemia ma le Sui Palemia ma Afioga i Minisita ma

Minisita Lagolago. Liliu i le la itu, maua se tofa ia Lauofo ma le la foi Vaega e agaia le tatou Malo, ae ola le leo o Sagaga 4.

FOFOGA FETALAI: Faafetai. Malo saunoa i le sui usufono mamalu. Se i tulai mai le sui usufono o Aana 3.

Afioga AGASEATA VALELIO TANUVASA PETO (Aana Alofi 3): Ou te tulai i le ava ma le faaaloalo lau Afioga i le Fofoga Fetalai ma le mamalu o le Maota, ua tau faailo ma faaleo se lagona e tusa ai foi ma le Lipoti, e le gata i le Komisi, ae faapea foi le Lipoti a le tatou Komiti.

A o le i oo se faamatalaga ma se leo i tulaga e faaleo ai se lagona, e muamua ia ona matou faatalofa ma faafeiloai atu i lau Afioga i le Fofoga Fetalai ma le mamalu o le Maota. E faatalofa foi ma faafeiloai i lau Afioga i le Tamaitai Palemia ma le mamalu o le Kapeneta, aemaise foi o sui usufono mamalu, tainane le affio o Afioga i Minisita Lagolago. E faatalofa foi i lau Afioga i le Sui Taitai ma le mamalu o lena itu o le Maota.

O paia o Ofisa Sili o Pulega o Matagaluega aemaise o Faalapotopotoga a le Malo ua tatou mafuta, e faapea foi lau Afioga i le Failautusi ma lou soa, tainane le mamalu o le afaigaluega.

Ua lologo lava le maota i le taua o suesuega ma sailiiliga a le tatou Komisi. O le mea lea e momoli atu ai le agaga o le faafetai tele i le paia o le Komisi, Taitaifono ma le mamalu o le Komisi i la outou fatuaiga tausii, aua o la outou pitolaau o le auiliili, lauliliu ae a luitau ma ni teuteuga talafeagai aua le agai i luma o a tatou Faiga Palota. O lea foi ua aumai le finagalo e ala i le iloiloaina e le Komiti o le taunuuga o le suesuega a le Komisi. Ia e momoli atu ai foi le agaga o le faafetai tele. Aua e i ai le talitonuga, na mafua ona mapu'e le faatofalaiga a le Komiti ona o sailiiliga ma le auiliiliga a le tatou Komisi. E le i itiiti le taua, e le faatauvaai foi le silasila a le tatou Komisi i vaili eseese ina ia faapena ona agai ai i luma le faataunuuga o tatou Faiga Palota e pei ona i ai le tatou mataupu o lo o tatou talanoaina nei. Ua mapu'e ai se lagona o le Komiti e afua mai i sailiiliga ma suesuega a le tatou Komisi. O le agaga o le faafetai lea. O lona uiga e le i faatauvaai, e le i pumoomoo ae na matua loloto e le gata i le tatou Komisi ae faapea foi le Komiti. Aua o lau maitau, e foliga o le tali lea a le Komisi o lea ua faatinoina e le Komiti. Ae i le aotelega o se lagona e lagolagoina ai le taunuuga o le iloiloaina e le Komiti o vaega e pei ona sailiili ma suesueina e le tatou Komisi.

Ae pau lava o lea, e i ai lava nai vaega e tau avatu ai se lagona o le tuualalo, ia o se fautuaga foi. Muamua, ua manino ma maoti ma patino nofoa o Puleono i Salafai. Ua pei, tulou, pei ua i ai se lagona pei ua faapito ae faapefea Tumua? O le agaga lea. E tatau foi la ona maoti ma patino, ni nofoa, e patino lava ia Tumua nei pe a tatou talanoa loa ua i ai le faaleaganuu e faasoa. O le tuualalo lea ma o le agaga foi lea e tau molimoli atu ina ia faapena ona o gatusa ma la outou faasoa ma la outou faatofalaiga.

O tatou Nofoa Tu Taulaga, o i e i ai sou lagona ma sou taofi ou te lagolagoina ai e tau pipii faatasi ma le 10 pasene pei ona tatou talanoaina. O le 10 pasene

pei e foliga mai o se gagana ua matuia i le tatou faalogo ona o fatia ma toa ma faafitauli na tulai mai ai. A o lou taofi, o se itu lelei ma e matua lagolagoina le i ai o sui usufono tamaitai i totonu o le tatou Palemene. E le na ma le laina le taua ma le amanaia. Ae i le faaaogaina ma le taliaina o tatou Itumalo Tu Taulaga, o i ina lea e tau avatu ai se lagona. O Tu Taulaga nei ua tatou le vaevaaina i itumalo faaalalafaga a o i la o le a agatonu agai i ai le sui usufono tamaitai. E faataunuu le agavaa o le sui tamaitai i aiaiga e pei ona talanoaina i le tatou Fono, e tataua ona i ai suafa matai. E tataua ona agavaa i le i ai i totonu o le Itumalo Tu Taulaga. E manino ai i i e tolu lava sui tamaitai e mautinoa i totonu o le saofaiga i so o se Paeaiga, ae tatala le avanoa e tumuai tutusa ai i le faataunuuina o tatou Faiga Palota mai tatou itumalo faaalalafaga. Aua o ai na iloa i le auai mai o sui tamaitai i le Palemene o lea ua foliga mai ua lua leo i totonu o le itumalo e tasi. A faapaleni ona fesiligia lea, o itumalo e tasi le leo ma itumalo lea ua lua leo i totonu o le Palemene. Ae pei e faapena se lagona, ina ia faaaogaina ai le itumalo tu taulaga ae faaaoga i ai tatou sui tamaitai e agavaa ai mo le agai mai totonu o le Palemene ma le saofaiga. O ou ia lagona, o lou lea manatu ina ia tutusa agavaa, ina ia tutusa le taumafai mai i totonu o le Palemene e ala i tatou itumalo faaalalafaga. E i ai le taofi e ono sili atu i le toalua sui a le itumalo faaalalafaga pe a oo ina pale uma mai tamaitai. Faataitaiga; afai e pale mai le sui tamaitai i le itumalo lea, ae tutusa le toalua o tamaitai foi i le itumalo lava lea e tasi e ono agavaa, o i ina lea ou te talanoa atu ai, e iu ina tolu sui tamaitai o le itumalo e tasi pe a oo ina tatou faatinoina le vaega lea o le 10%. O le ala lea, o le ala lea o le tuualalo atu...

Afioga Sulamanaia Fetaiai Tauilili Tuivasa (Vaimauga 1): Lau Afioga i le Fofoga Fetalai pe maua se avanoa?

FOFOGA FETALAI: O le a se mafuaaga o le faauilavea?

Afioga Sulamanaia Fetaiai Tauilili Tuivasa: Ona o le... E le faauilavea lava Tuisamau pe a lauga foi Leulumoega. Ae ona o lea e talanoa i le tulaga i Nofoa Tu Taulaga, e pei la e i ai i ou eleele o Vaimauga. O lea la e fia fesili ai i le sui usufono, po o lona uiga a faapea e fai le Faiga Palota lea la fai i Itumalo Tu Taulaga o matou i Vaimauga, o lona uiga e aumai lana tamaitai i tua i Aana e tauva ai? E pei o le agaga lena lea e fia maua ai se malamalamaaga o lenei sui usufono ona o la e manino lava le aumai e le Komiti, e fai isi seats i Tu Taulaga mo ē o lo o alaala ai. A o lea la e pei e saunoa le sui usufono, o lona uiga la, o tamaitai uma lava i tua i lona itumalo e le tauva i tua ae aumai e tauva i seats nei le Tu Taulaga? E pei o le agaga lena e fia malamalama ai le sui usufono o lenei itumalo.

FOFOGA FETALAI: Ia o lou popole lava ia ae o le finagalo faaalua o le sui usufono ae le o fai ai. Se i tulai mai le sui usufono.

Afioga AGASEATA VALELIO TANUVASA PETO: Faafetai i lau Afioga i le Fofoga Fetalai. Faafetai foi mo le faauilavea. O lea lava tatou te i ai i luga o tatou felafolafoaiga ma faaaliga o finagalo ma manatu...

FOFOGA FETALAI: Toe lua minute o le sui usufono.

Afioga AGASEATA VALELIO TANUVASA PETO: E leai foi se agaga e faapea e omai ia... O i latou lava o lo o aumau i totonu o nei nofoaga tu taulaga ua agavaa i le faamoemoe e pei ona tau molimoli atu.

Lau Afioga i le Fofoga Fetalai, ua... mo nai o tatou tagata o lo o alaala i atunuu i fafo mo le faaavanoaina mo le palotaina mo le palota mai i totonu o le tatou atunuu. Ia e ui lava ua aumai le fautuaga a le tatou Komiti, peitai ane, o loo faapena ona iai i se taimi. O le tatalo, o le a le taimi. Pei ona iai se lagona e tau molimoli atu.

Ia, lau Afioga i le Fofoga Fetalai, ia na pau na o ni manatu ma se lagona. A o le aotelega e lagolagoina ai le Lipoti a le tatou Komiti e pei ona i lumamea nei. Ia manuia lau Afioga i le Fofoga Fetalai. Ia manuia lau Afioga i le Tamaitai Palemia ma le mamalu o le tatou Palemene. Soifua ma ia manuia.

FOFOGA FETALAI: Malo faafetai. Ia masalo toe toatasi le tatou sui usufono lea e fofou mai.

Ia tulai mai Faasaleleaga 2. Oi, ia e faamalulu atu i lau Afioga le Minisita mo Fesootaiga se i faamuamua mai.... Tulai mai le Afioga i le sui usufono mamalu mai Faasaleleaga numera 2.

Afioga MAGELE SEKATI FIAUI (Faasaleleaga 2): E faatalofa atu i lau Afioga le Fofoga o le Fono i lenei vaega o le aso. E faatalofa foi i le afio o lau Afioga le Palemia, Sui Palemia ma le mamalu o le Kapeneta aemaise foi o Minisita Lagolago o lenei itu.

E faatalofa foi i lenei itu. Afio lau Afioga i le Sui Taitai aemaise o sui usufono mamalu uma o le Palemene. E faafeiloai ma faatalofa atu i Ofisa Sili o Pulega o Matagaluega a le tatou Malo aemaise foi o Vaega Tumaoti ma Faalapotopotoga, ae tainane foi lau Susuga i le Failautusi ma le Sui Failautusi aemaise o le Ofisa o le Fono. Malo le galulue, malo le onosai i tiute ma faiva ua tofia ai tatou e tatou te galulue ai i lenei vaitau.

Lau Afioga i le Fofoga Fetalai, ou te taofi o lea ua maea ona lalafo foe o le savili ma tatou amiami faga, amiami faga i le Atua e ou le faga e ala i lau faautugasegaula i le taeao ua sola ina ia to manu o le Atua aua faiva o lenei Palemene. Malo faafetai. O lea ua matau ua tatou i ai i faaiiuga o galuega a le Palemene o lenei vaiaso aemaise o lenei Lipoti.

Ou te taofi foi o lea ua uma ona e faapai aua le tapuaiga a Samoa le atunuu pele. Ona manatu lea o le a taoto le fiso ma ona lau aua paia o Samoa ae o le a sasaa i tai le faiva o Pili aua se motugaafa e fai ma sao o si ou itumalo e faitau ane ai le faasoa taua ua tapisa ai nei le Maota e tauala i le Lipoti a le Komiti.

E momoli atu le agaga faafetai i lau Afioga i le Fofoga Fetalai i le Taitaifono o le Komiti, Sui Taitaifono ma le mamalu o Sui Usufono o le Komiti sa lauliliuina le Lipoti a le Komisi. Ina ua ua ou oo atu e faaoo atu se lagona e tusa ai foi ma se tasi o nuu mavae o lenei Itumalo ua fautuaina mai e le Komisi e aveese mai. O lea sa ou oo atu ai ma avatu se lagona i lau Afioga i le Taitaifono, ae momoli lava le agaga faafetai o lea ua matau atu i le faatulagana ua aumai i itumalo faalaalafaga o lea ua toe taoto lelei lava lenei Itumalo ma sagatonu lau o le fo i ona tuaoi faaleaganuu e pei ona i ai le taimi nei. O le mea lea e avatu ai le agaga faafetai ma le faamalo.

E fia faaleoina foi le agaga faafetai lau Afioga i le Fofoga Fetalai i le tulaga ua faatulai ai nofoa faaopoopo mo Salafai aua Puleono, e momoli atu ai le agaga faafetai. O lea foi ua taoto saunoaga o le Maota lenei aua Tumua nei. O le lagona foi lea e piiama atu ai i lau Afioga i le Fofoga Fetalai ma le mamalu o lenei Palemene. Afai foi e sao le matau ma le faitau i ai e tusa ai ma fautuaga ua tuuina mai, e foliga mai o lea foi o le a maoti nofoa o nisi o taeao faitauina o Samoa aua le Atua ma lana Talalelei, aua Mataniufeagaimaleata, ae faaapea Malaeola ma Nafoga.

I le matau a lenei Itumalo, o le faamatietie ma le faamaupuepue lea, aua le Talalelei e matua i ai le tuu aemaise foi o le faamaupuepue ma le faamatietie i le faaleaganuu. E momoli atu ai le agaga o le faafetai ma le faamalo i le galuega maeaea.

Lau Afioga i le Fofoga Fetalai ona oo mai lea o se manatu i le mataupu lava lea e pei e laualuga i le faasoa a le Maota i le vaega o le Tulafono o le 10%. E le o se mataupu faigofie le mataupu lenei, o lea lava ua matauina i folasaga a le Moata lenei. O se mataupu e maaleale ma e le o se mataupu faafuainumera lau Afioga i le Fofoga Fetalai. O le mataupu lenei e faatatau i Tamaitai o le atunuu lenei o Samoa. E i ai le manatu ua to i tua Apolima, uma taimi i vesiga sa tatou i ai i lea mataupu, ae sili ona taua i le Atua la e silasila mai o le taimi nei ma le tatou agai i le lumanai, aua se fua i le fuaga lalovaoa o le atunuu aemaise lava o le faataua mo tamaitai.

Ina ua sasaa faaoti le uta a le faimea i le mataupu lenei lau Afioga, sa ou alu lava i le fale ma mafaufau loloto i ai i lenei mataupu. Faitau, faitau, tatalo, tatalo i le Alii e suli le musumusuga o le Agaga o le Alii, o le a se lagona e tufa atu aua lenei lava mataupu taua. Lau Afioga i le Fofoga Fetalai e le i faia e le Atua le tina ia tu i tua o tama, pe na faia e tu i luma o tama, na fai ia tu i ona autafa, tutusa ai laua, neither behind him, nor ahead of him but at his side. The Lord values his daughter just as much as he does his sons. Ou te le i iai i le Paeaiga na faaofi ai le 10%, ae o le mea e tulitulimatagau i sou lagona, o le agaga moni na faatulai ai. The real intention behind this provision. What was the motive behind it? Na mafua ai ona faatulai ma pasia i lena taimi ma tuu i le Faavae. Was the motive, ina ia faatoatele ai le fuainumera o se vaega, or was it to guarantee the Seat of Women in the Parliament?

Lau Afioga i le Fofoga Fetalai, afai o le true intention ina ia faamautinoa le i ai o se sui tamaitai i le Maota lenei, ou te auai i lena. Ae afai o se isi mafuaaga, ia, e leai.

Lau Afioga i le Fofoga Fetalai, e matau e tele lava saisaitiaga po o barriers mo tamaitai, e pei foi ona saunoa i ai nisi o le Maota lenei. E i ai nisi affioaga e faasa ona matai tamaitai, e i ai foi nisi aiga e le mafai foi ona matai ia tamaitai. O nisi foi aiga e le mafai ona matai faafaleupolu se tina po o se tamaitai. O nai faataitaiga na o tulaga o le saisaitia o avanoa mo tamaitai, creating a more even playing field, o le agaga lena. 10% provision is a special measure which recognizes that there are discriminating elements that prevent women from participating in public life.

Lau Afioga i le Fofoga Fetalai, never let a problem to be solved become more important than a person to be loved. O le agaga lea lau Afioga i le mataupu lea, ma e teena e le usugafono lenei le aveesea o le 10% provision mo tina. A na aumai le fautuaga a le Komiti e teena le calculation lea na mafua ai na tatou vevesi, atonu e talafeagai foi le tele o saunoaga i le mataupu lenei. A o le lagona lava lea o le sui usufono lenei ma lenei Itumalo ua folasia atu.

Lau Afioga i le Fofoga Fetalai, a faaopoopo atu i nai vaega ia e lagolago le tulaga o le tuu i lalo o le sala tupe mai le \$2,000 i le \$100 mo i latou e le fia o e fai le latou lesitala ona o se vaega taua e ao lava ona faamalositia le resitalaina o tagata o le tatou atunuu. Ae i ai foi le isi Tulafono o lea sa tau matau i le tulaga foi lea o le faasalaga e ave i le tagata e le palota. O se manatu o lenei sui usufono, aveese lea faasalaga, o le aiatatau lava lea a le tagata e fai ai lana palota ae tuu atu pea le agaga faamalositia i le resitala, ae tuu i le faitalia o le tagata e fai lana palota pe le palota.

Lau Afioga i le Fofoga Fetalai, o le a foi Sina i Futu. Agalelei le Atua ia punitia vaiali ae tala vaiola lau Afioga i le Fofoga o le Fono, aemaise foi o le mamalu o le Palemene ma le aofia ua potopoto i Tiafau nei, ae maloloina lenei sui usufono. Soifua ma ia manuia.

FOFOGA FETALAI: Malo faafetai, faafetai mo lou sao. Ia, o le avanoa lenei i lau Afioga i le Minisita o Fesootaiga po o le sui usufono mai Falealili 1.

Afioga Hon TOELUPE POUMULINUKU ONESEMO (Falealili 1): Faafetai atu i lau Afioga i le Fofoga Fetalai, e tusa ai foi mo le avanoa o lenei sui usufono mai Falealili e taumafai ai se vaivaiga, aua lenei mataupu taua e pei ona taoto i le Laulau-a-Fono.

E muamua ona matou faafeiloai i le taotoga o i'asa aua le Maota o Samoa aemaise foi o le tapuaiga a Samoa o lo o tapuaia faiva o lau Afioga ma le Palemene, mai lava i Mataisaua seia paia Fili ma Puletuu. Faatulou, tulou, tulouna lava.

E feiloai atu foi ma faatalofa i si ou Itumalo i le Afio o Alaalagafa ma la oulula Nofu ae a le Tauagaeseese ia Falealili. Tapuai maia se i momoli se tatou vaivaiga aua lenei aso ma le mataupu taua.

Lau Afioga i le Fofoga Fetalai, o le agaga fiafia i lenei aso e tulai ai e momoli se tofa ma se faautaga a lenei Itumalo. O lenei mataupu o se mataupu taua, aua e le gata i lavasiga na tomua ai lenei Paeauga, a o se fua mo le lumanai o le

Palemene o Samoa. O le ala lea lau Afioga e tulai ai faa-sui usufono aua si ou Itumalo.

E muai momoli le agaga faafetai i le Komisi sa filifilia. E tauala foi le faafetai i le susuga i le Minisita mo le filifiliga o le Komisi lea, aua a silasila i ai, ia, o tama ma tina matutua, aemaise foi auauna o ē sa tautua i le Malo, a o lo latou sao lea mo Samoa. E ui e tulaga mai e teena nisi o vaega o le Lipoti, a o lea ua taoto i le Palemene lo latou sao mo Samoa mo nei ma le lumanai.

Faafetai foi i lau Afioga i le Palemia aemaise lau Afioga i le Fofoga Fetalai, aemaise foi o le Komiti i le process lenei ua faatino e ala i le galuega lenei, aua e le gata na tapena ma saili finagalo o le atunuu a o lea foi ua aumai i le Palemene, ae le i faia i ai se filiga a le Kapeneta ma le Afioga i le Palemia. O se faafetai faapitoa lea a lenei Itumalo i le tulaga taua o lenei Lipoti.

E manatu e le toe salaese le lagona o Falealili i le tulaga lea ua taoto ai nei le fetuunaiga e pei ona aumai e le Komisi. E lagolagoina e lenei Itumalo le toe faamalasia ma toe opogi Itumalo Faaleaganuu. Lau Afioga e tele tausaga o tatou saafi ma malupuipua, malulalotao le filemu o le tatou atunuu i le tatou aganuu. O le lagolago foi lena a lenei Itumalo ina ne i tatou see ese ma fuainumera ae o lo o lelei tapui mea uma e ala i le tatou faaleaganuu.

Na o si mea laitiiti lea lau Afioga e... oo mai lea i le Lola Palota, o le isi lea fautuaga a le Komisi. Lau Afioga o lo o manino lava le tulaga o le Tulafono i le tulaga o le Lola Palota, peitai e le i toe i ai lava se campaign a le Ofisa o Faiga Palota e toe teuteu ai Lola Palota. E i ai le suiga ole Tulafono e te palota i le mea e te alaala ai, peitai i le maea o le suiga o le Tulafono, e le i faatinoa le galuega lea ina ia toe.... aua ua tele ina feseetai le Lola i tulaga o palota. Na o se tuualalo lava lena a lenei Itumalo.

E pei lava foi o le tulaga o lo o taoto ai le Lola Palota i se matou matau ma lenei Itumalo, e pei o loo favor le Lola Palota i sui usufono o lo o tutu mai. O le ala lena lea sa pei ona taua ai e nisi o sui usufono le tulaga o le road show, aua o le ala lea e taua ai le road show e pei ona faatinoina. E tau faapulapula ma tau avatu ai se avanoa talafeagai mo nai sui usufono fou mo le faalagamaea. O le avanoa lea. Ae a tapena le... e tatalo atu ai i le tulaga e taua le toe silasila i Lola Palota aemaise lava ia faamalasia le tatou Tulafono i le resitalaina o sui palota.

Lau Afioga, ona ou oo mai lea i le 10% mo tamaitai. O le tulaga moni lau Afioga e lagolagoina le faatauaina o tamaitai i taitaiga i so o se vaega o le tatou siosiomaga ma le tatou atunuu. E i ai nai vaega na ona toe faatepa i ai le tatou atunuu ma lenei Palemene i le tulaga sa agai mai ai. I le matau pe a silasila i ai i le amataga o le Palemene, tele ia o avanoa sa i ai, aemaise lava le sao taua o le Fono Aoao a Tina, o le isi lea laasaga sa tapena e tama ua tofa mai tiasa mo le sao taua o tina e le gata i nuu ma afioaga, ae mo le Fono Aoao Faitulafono. O le isi lea vaega lau Afioga e nanau ai lenei itumalo se i toe silasila lava i le sao taua o le Fono Aoao a Tina.

Lau Afioga a silasila foi i le tulai mai o le Afioga i le Tamaitai Palemia ma lenei Faigamalo, i avanoa tutusa i totonu o Komiti o Atinae a le Itumalo, o le agaga tonu lea e 50% tamaitai 50% alii, le faatauaina o sui o tina aua lo latou

sao aua lo latou finagalo mo le lumanai manuia o tatou tagata. A silasila foi i le saofaiga a Ofisa Sili o Pulega o Matagaluega i lenei vaitau, o le toatele ia o ē ua pale mai o tamaitai ma o le ata manino lea lau Afioga i le Fofoga Fetalai o le lumanai, e mafai ona siitia le aofai o tina i totonu o le Palemene lenei.

A oo foi i le tatou faa-Samoa lau Afioga, o lau matau faa-tagatanuu ma faa-sui usufono, o tatou tina e tau musu i le mea lea o le corruption o i latou o pae ma auli, e le au tele lo latou lagona i faiga faaalatua. O lea ua saunoa le toatele o le Maota i le seleni alu i mea nei o palota. E manatu o se tasi lea o vaega e tau leai ai ni tina e agai mai i Faiga Palota ona o le pae ma le auli e le mafai ona faaituau so latou lagona ma taumafai i tulaga faaalatua e pei ona i ai. O sou lea talitonuga, ae a mafai ona galulue e faaitiitia le corruption, atonu e tele se avanoa mo nai o tatou tina i le lumanai.

Lau Afioga i le Fofoga Fetalai, ona ou see mai lea i le tulaga e pei ona tau faaiuu ai le Lipoti i le tulaga o o’o o faipule, e taliaina i le agaga faafetai o lenei itumalo vaega uma lava e pei ona saunoa i ai le Taitaifono o le Komiti ma e i ai le taofiga o lenei itumalo, o le finagalo o le Komiti ina ia taofia o’o ae tatala le asia pea e tagata taitoatasi o le sui usufono i ia aso ma ia aso. O le mea moni lau Afioga, na o le toe tau faapulapula ma se i toe... i le tulaga o le faatinoga o le omai o tagata palota i le sui usufono i aso taitasi, e i ai lou talitonuga o le corruption le tulaga lena. Ae o le o’o o le faa-Samoa ma le mea e tataua ona fai. Na o se tuualalo a lenei itumalo, ina ne i o tatou tatala le corruption e pei ona i ai fesili o fea e vase ai le laina o le corruption ma le o’o.

Lau Afioga o lo o iai foi totonu o le Lipoti le palota mai fafo. E le tele se lagona o lenei itumalo i lena vaega. E manatu foi o lo o nofo fale i finagalo o lenei Palemene le tulaga faapopoleina e pei ona i ai le tele o restrictions ia i latou e agai mai fafo ma taumafai e o i le palota, ia le na o le tamaoaiga aemaise foi a tatala le palota i fafo, e i ai le tulaga foi lea o le influence ai aua ua tele le Samoa i fafo i lo le tatou atunuu.

Lau Afioga i le Fofoga Fetalai, na o se mafaufauga fai vavale o lenei itumalo e le fou lenei tulaga, lea sa i ai tatou seats faaagaaga mo i latou e faaiu palagi ma tulaga faapena, e le influence ai le outcome o le tatou palota a o lo o i ai avanoa. Na ona tuualalo faapena lenei itumalo. E mulia’i se tapenaga a lenei itumalo e fesoasoani, na o motugaafa aua le Palemene, o le maota o Tumua ma Pule, e manatu o lo o manino lava le naunautaiga o le Komisi sa faataatia mai ai lea vaega. O le tele lava o Pulega e pei o Ausetalia e pei foi ona tatou feiloai anapo ma le delegation mai Tasmania e lua o latou Maota o le Maota Faitulafono ma le Maota e toe iloilo ai. E le faapea o le a iloilo ai o le a sui, a o suiga e toe aumai lava i le Palemene.

O le naunautaiga lau Afioga lea sa tatou matau, i Tulafono sa i ai le tulaga faananati, o Tulafono e tele le aafiaga o le atunuu, aemaise lava le Tulafono o Eleele ma Suiga o le Faavae. E i ai lou talitonuga, e manatu o i ina sa silasila i ai Sui o le Komisi aua o se faataatiaga lelei mo nei ma le lumanai, a o fea o lo o taoto ai le tulaga e toe iloilo ai ma faamautu Tulafono lelei aua le lumanai manuia o Samoa. Ia ona maea ai lea o se vaivaiga o lenei itumalo ma se sao. O le agaga ina i ai se sao o lenei itumalo ona o le taua o lenei mataupu. Ia

faamanuia le Atua i lau Afioga, aemaise le Afioga i le Tamaitai Palemia ma le Kapeneta, sui usufono o le Palemene aea le tapuaiga a Samoa aemaise si ou itumalo. Manuia lenei afaifi. Faafetai.

FOFOGA FETALAI: Ua faamalo saunoa i lau Afioga i le sui usufono mai Falealili 1 mo le sao foi i le tatou Lipoti.

Ia, ou te tapa lau Afioga i le Taitaifono e matau atu o lea ua maea saunoa le paia o le Maota.

Ia tulai mai lau Afioga i le Sui Taitai o le Itu Agai.

Tofa Hon Lauofo Fonotoe Nufesili Pierre Lauofo (Anoamaa 2): Lau Afioga i le Fofoga Fetalai, o au foi o se tasi sui o le Komiti ae fia maua se avanoa e fai ai sina upu puupuu faa-sui usufono o lou itumalo, a o se taimi ona saunoa lea o le Afioga i le Taitaifono e talifuaitau ai i saunoaga matagofie a sui usufono mamalu o le Maota. Ae tasi lava se mataupu na ona ou fia pai lava i ai ona o lea foi e taua i totonu o le Lipoti lou sui usufono. Ma le faaaloalo.

FOFOGA FETALAI: Masalo lau Afioga i le Sui Taitai a ou tatala atu nei le avanoa lenei o lona uiga ua fia saunoa uma lava la outou Komiti. E te silafia a tatou Tulafono Tumau, o le sui lava o la outou Komiti o le tou finagalo uma lava lea ua i totonu o le tou Lipoti. O lea e i ai le tou Taitaifono. O le agaga lena lau Afioga i le sui usufono mamalu.

Tofa Hon Lauofo Fonotoe Nuafesili Pierre Lauofo: Faafetai lau Afioga i le Fofoga Fetalai, aua e pei o le mafuaaga o lo'u tulai, ona o lea e faamau i le Lipoti lou le auai i finagalo fulisia o le Komiti e soloia le 10% o tamaitai.

FOFOGA FETALAI: Ia lea ua faamau le tulaga lea...

Tofa Hon Lauofo Fonotoe Nuafesili Pierre Lauofo: O lea la na ona pei e fia pai lava i ai sau tala ona uma lea ou nofo i lalo, aua o lea foi ou te matau atu i sui o le matou Komiti e leai se isi o finagalo e saunoa. Ioe. Ona o lea e tasi lo latou finagalo i le isi itu e pei... i le mataupu lea, na o le pau lava lea o le mea na ou fia pai i ai e le umi a e na o le lua lava minute.

FOFOGA FETALAI: I le ala lava o mea, ia malamalama lelei lou sui usufono mamalu, o lena ua faamau lau teena i totonu o le Lipoti. O la e lava ua manino lelei lea foi ua agiga i saunoaga. O le a la le isi mea o lele lava ua malamalama le faafogafoga mai a le atunuu, o lea foi ua faailoa lou teena e pei ona i ai i totonu... o ala na o mea. E le toe faaalua se isi finagalo i talaatu o lena mea ua i ai, ae faafetai o lea e soifua manuia la outou Komiti. O le mea lea e faamalulu atu i le Sui Taitai, leai e lava foi le tofa ma le silafia i lau Afioga. O le mea lea ia tofa malie.

Tofa Hon Lauofo Fonotoe Nuafesili Pierre Lauofo: Ua lelei lau Afioga o le a usitaia lou finagalo, ne i e faapea ua ou faatautee i lou finagalo...

FOFOGA FETALAI: Ia malo faafetai. Faafetai.

Tofa Hon Lauofo Fonotoe Nuafesili Pierre Lauofo: I tulaga e pei ona i ai ia ae faafetai, maua se avanoa i se isi aso o muamua aua o Lipoti mea ia e talanoaina ae o le a talia le faaofi mai o le Tulafono Tau Faaofi, o le a maua ai foi le avanoa. Ia ae pei ona o le faatauaina lava o le galuega a le Afioga i le Taitaifono ma le Komiti lea na tau tulai atu ai ae faafetai.

FOFOGA FETALAI: E tele lava le isi a tatou galuega e toe fai mo le agai i luma o lea faatoa tatou amatamea.

O le mea lea tulai mai lau Afioga i le Taitaifono.

Afioga AUUPAAU MULIPOLA ALOITAFUA MULIPOLA (Taitaifono Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae): E momoli le faafetai i lau Afioga i le Fofoga Fetalai mo le avanoa. Sala ia ina soua Fuluasou o vai o Faleata aua ua toto i ai tautiaga o le tagati'a a le atunuu. Ma le agaga faaaloalo ou te tulai ai se i talifuaitau i nisi o finagalo na faaalua o le Maota leni e uiga i le Lipoti a le Komisi o Faiga Palota 2021 faatasi ai foi ma le Lipoti a le Komiti o Tulafono Tumau a le Maota, Mataupu Tau Faiga Palota, Talosaga ma Tofiga Faale-Faavae.

Na faamauina ma le agaga faafetai finagalo eseese na faaalua o le Maota e tusa ai o le Lipoti a le Komiti. Na faamauina foi le siita'i o finagalo e tusa ai ma le faamaumauina, e 29 finagalo na faaalua i mataupu eseese ua faaalua i totonu o le Lipoti. Mai lea 29 finagalo na faaalua e eseese uma lava vaega o le Lipoti ma fautuaga a le Komisi ma fautuaga a le Komiti sa faaali ai finagalo. Peitai, e lua lava vala tetele e le i asa ai lava se finagalo o sui usufono o le Palemene leni. Muamua o le 10% ua faatulai mai. Lua o le mataupu e uiga i le toe faatulagaina o itumalo faapalota ina ia avea ma itumalo faaleaganuu po o faaalalafaga e pei ona taua i le Faavae o le Malo Tutoatasi o Samoa.

O i latou uma na faaalua finagalo e tusa ai o le 10%, na faamauina i latou e 18 sa finagalo e faaauau pea le i ai o sui tamaitai i le Maota ma le toavalu na talia le fautuaga a le Komiti ma le sui usufono e toatasi e le i maoti sona finagalo na tuuina mai. Lau Afioga i le Fofoga Fetalai se i faamanino tulaga ia ma le faalagiga na i ai finagalo o sui usufono, finagalo o sui usufono ina ia faapea e teena sui usufono tamaitai ma finagalo na faaalua e faapea e teena le 10%. Le mamalu sau'o o le Palemene ma lau Afioga i le Fofoga Fetalai, e eseese vaega ia e lua i le matau a le Komiti. O le tulaga faapea e teena sui usufono tamaitai masalo o lo'o sau i le vaega foi lele le finagalo o le sui usufono lea ina ia aua lava ne i resitalaina se sui tamaitai e tauva e fia faamanino le tulaga lena. Ma le finagalo ina ia tuuese le 10%. O lona uiga o le finagalo faaalua e mafai na tauva i le Faiga Palota sui tamaitai ae a oo mai i le 10% ua le atoa finagalo o le Maota

ma maua le numera e pei o le toaono ona ese lea o lona finagalo. O le vala lea e fia faamanino le vaega lea.

Mo le silafia e le Maota i le vaega muamua lea, o le tuuina mai o le Lipoti a le Komiti lenei na mafua mai i le suesuega a le Komisi Suesue sa i ai. E pei ona avatu le atoaga, e 2,175 i latou sa soalepule, e i ai pasene na tuuina atu ai tamaiti aoga faatasi ai ma i latou sa afea itumalo ina ua oo atu le Komisi lenei. E tele finagalo na faaalua i le laitiiti o le pasene sa faatalanoaina. E faamalulu atu i le mamalu o le Palemene, o pasene lava na sa fua i le galuega a le Komisi ae le o le Komiti. Ua faamauiina o outou finagalo i le lē atoa ma le laitiiti o le vaega o le atunuu sa soa i ai le pule a le Komisi lenei.

E fia faia se faamatalaga e uiga i finagalo faaalua taitasi i le taua tele o pasene nei le 10%, e pei foi o nisi finagalo na faaalua ona e mapuna mai i totonu o le Malo Afaatasi ma le naunautaig ina ia faataua le ituvai o tina ma tamaitai i totonu o le Palemene, ma e manino lava le vala lea. E ese ma le taua o finagalo, e le i aloese foi le Komiti lenei i le lauliliuina o le taua o lea finagalo ona e afua mai lalo o Pulega a Malo i lalo o le United Nation e pei ona faaalua le tele o finagalo. Aepeitai ina ua faatamilo le Komisi ma aumai ai faamaumauga.

O le mea e fia faamanino i le Lipoti a le Komisi ina ua oo mai luma o le Komiti, e tolu filifiliga sa aumai i ai le finagalo o le Komisi ina ia faia filifiliga mo le faatauaaina o le 10%. Peitai i le tilotilo ma le mau a le Komiti i le faataamilosaga o le faatalanoaina o le atunuu, sa faaali finagalo o le atunuu e teena le 10%. Aepeitai, e le i aumaia le filifiliga lona tolu lea, o lona fa lea i le Lipoti a le Komisi. E tolu filifiliga na agai i ai le Lipoti a le Komisi, ae na noatia le finagalo o le atunuu sa faatalanoaina, sa tataua ona aumai i ai ma le option lona fa la lena.

I le tilotilo la a matou i le Komiti, ua noatia le finagalo o le atunuu sa faaalua le faataamilosaga lea. O le ala la lea o le fua i ai o le matou iloiloga, pe na mafua i sea ona tuu ese le finagalo o le atunuu. Lea la ua toe faaauau mai e le Komiti le finagalo o le atunuu, ina ia aua ne i oti i tua se lagona, tulou le gagana. O lo o faaofofoga Samoa i le vaega lea e ao ona maioio. O le mafuaaga lena o le matou avatu o fuainumera na laasia ma finagalo o le atunuu, ona sa noatia le aumaiga o le option lona fa lea.

I le matau atu i ai e tusa o finagalo faaalua i le eseese o finagalo faaalua i le lē talia o le 10% ma le talia o le 10% e ese mai ai le finagalo i le lē talia o sui tamaitai, lea ua ou faamalamalama le vala lea i le Lipoti a le Komiti.

E fia fai se faamatalaga ina ia maua lelei le aano o le Lipoti lea ua aumai e le Komiti lenei. I le faagasologa mai o le Faigamalo sa i ai alaafaga sa lua palota sa faatinoina, e saili ai ni o latou sui usufono faaalaafaga e lua, alu ai alu ai suia le Tulafono ona tu lea o le Tulafono i se tulaga faapea. E toatasi oe tasi lau palota. O lona uiga e te filifili i le sui o lou itumalo, tasi lau palota ma lau filifiliga sa i ai. O lea lava sa sau ai na sei oo mai foi le Paeiga 16 ua tea atu nei, o le tulaga sagatonu lena sa i ai ma faatulafonoina loa.

I le matau la ma le saililiga a le Komiti lenei i ana saililiga, afai e saofaga mai se tamaitai, sui tamaitai e ave ma sui usufono o le Maota lenei ae ono lua i ai ni sui o le Itumalo, o le tulaga lena lau Afoga i le Fofoga Fetalai sa lilifa i

ai le Komiti lenei. E le o se vaega na faapaole i ai le tilotilo a le Komiti lenei, sui usufono mamalu ma au lenei. Afai la e saofaga mai le sui usufono filifilia o le itumalo ma se sui usufono ua saofaga mai i le faaaogaina o le 10%, ona toe foi lea o le manatu o le Komiti ma au nei i le mea sa i ai le suega o sui usufono faaalalafaga. E tasi la le palota na faatino e sui uma, e tagata palota o le itumalo ae ua maua mai ai la sui ia e toalua. E faamalamalama le vala lea leaga o la e faafofoga Samoa aemaise o le paia o le Palemene lenei. A o le agaga lava latou ma le faamoemoega ma le finau a le Komiti, na mafua ona o le Lipoti o le Komisi. E ui i lea, e le o le taunuuga lea o lo o i ai le Pule Faatonu ma le Pulega Faatonu i le vaega lea e fia faamanino ai le vaega lea. E le oo le leo o e Komiti lenei po o le 5 po o le 6 sui, e faaeteete leaga ua uma ona oo le Maota lea i le Faamasinoga, e liolio foi i ai e faamamalu i le tatou Faamasinoga ma ana faaiuga e fai.

Ona tatou oo mai lea i le tasi vala lautele e tusa ai o le fefulisaiga ina ia toe faatulaga Itumalo Faapalota o i ai nei i Itumalo Faaalalafaga. E faamauiina ma le agaga faaaloalo le paia o le Palemene ma lau Afioiga i le Fofoga Fetalai, e pei lava ona ou taua itutino sa agai mai i luma o le Komiti lenei. O sui o le Komisi, o le Ofisa o le Komesina o Faiga Palota, Fuainumera Faamaumauina a le Malo o Samoa, O Sui o le Sosaiete a Loia ma le mamalu o a outou Afioiga, ina se i mapo ai le Lipoti a le Komiti lenei. E faamauiina ma le agaga faafetai le mafuli o mau ina ia toe foi le faatulagana o Itumalo i Itumalo Faaleaganuu po o Faaalalafaga e pei ona faamauiina i le Faavae o le Malo o Samoa.

E fia tali atu e tusa o finagalo na faaalai i Itumalo Tu Taulaga. E fia faamanino le paia o le Palemene lenei, e pei lava ona ou fai atu, tulou lava le paia o Itumalo o le Vaimauga ma le Faleata. O Itumalo Tu Taulaga ia e pei ona avatu le fautuaga ina ia toe faamatie mai ma toe momoli mai Itumalo Tu Taulaga e le o i ai se faalagiga faapea - Vaimauga Itumalo Tu Taulaga, pe faaaogaina foi Faleata Itumalo Tu Taulaga. E leai.

O lo o manino lelei le Lipoti e liolio le toe faaaogaina o Suafa o Itumalo. Pau lava lea o le avatu lea e avatu manino ai - Itumalo Tu Taulaga Sisifo, Itumalo Tu Taulaga Ogototonu ma le Itumalo Tu Taulaga Sasae. E noa lava ma se faaaogaina o le paia o Itumalo a o lea ua tumau lava le fautuaga a le Komiti, o Itumalo e pei ona i ai Vaimauga ma Faleata faatumauiina pea fuainumera o i ai i le 4. E pei ona sau ai i le amataga ma Paeaiga sa faaaogaina ai Itumalo Faaalalafaga lea ua tatou i ai i le vaitaimi lenei o Itumalo Faapalota. O lo o faafuainumeraina i le 1, 2, 3, 4, pau lava lea o le suiga o le suiga mai le 4 Itumalo Faapalota i le 4 Itumalo Faaalalafaga.

O le naunautaiga o le Komiti ina ia mapo lava le filifiliga o Itumalo Faaalalafaga i ona tuaoi faaleaganuu. E mafua lea tulaga ona o le tagatagai a le Komiti ma au nei i fuainumera na tuuina mai e le Komisi, Suesuega o le Faiga Palota 2021. O le upu tautino, e feteenai ma le Lipoti a le Ofisa o Faiga Palota 2021. Na matou faaaogaina loa lea o le Lipoti lea o le sao atoatoa lea e aumai.

E fai lava si valavala o fuainumera ua tuuina mai e le Komisi ma le Lipoti lea na maua ai le atoaga o finagalo o Sui Usufono ma lou tagata. O le faamanino

lea o le vala lea pe mafua i sea ona matou aumaia fautuaga ma teuteuga nei. E le natia...

Afioga Fuaava Suluimalo Amataga (Aleipata Itupa i Luga): Lau Afioga i le Fofoga Fetalai pe maua se avanoa faamolemole.

FOFOGA FETALAI: Ia pe i ai se mea o...

Afioga Fuaava Suluimalo Amataga: Faafetai. Leai o si mea e manaomia se faamalamalama e tusa ai ma le saunoaga a le Taitaifono o le Komiti. O lea ua faalogologo atu ua i ai le faamaninoina lea o Nofoa Tu Taulaga ia e 3 i totonu o Vaimauga faapea foi Faleata, a o lea foi e i ai nofoa ia Faaitumalo e 4, pei o Vaimauga aemaise foi o i i Faleata.

Ae pei o si vala lea e fia maua ai se malamalamaaga, o le saunoaga lea a le Taitaifono i tatou Sui Tamaitai. Ona o lea e i ai le popolega lea e tai pei la o Aleipata Itupa i Lalo , o lea iai lou talitonuga o le sui filifilia a ia o Aleipata Itupa i lalo o lea ua manino, a o le sui tamaitai o le sui faaopopo lea mo tamaitai. Ne i te i ua faapea o lea ua lua ai Aleipata, o lea foi e i ai tulaga o lea e i ai le popolega ina ne i te i ua toe tu mai ma se isi Aleipata Itupa i lalo ona tolu ai lea o sui o le itumalo. E pei ona i ai le agaga o lo o i ai lava sui usufono patino lava ia ua filifilia mo itumalo, ae o sui o tamaitai mai le 10% ou te iloa o le latou lea matafaioi, o sui faaopopo tamaitai e pei ona i ai i totonu o le Faavae. Ae pei o le tulaga foi la lea ua e saunoa o Nofoa ia Tu Taulaga o lea ua i ai le 4 a Vaimauga, ua i ai foi le 4 a Faleata, a o lea foi ua i ai ma le 3 faaopopo lea o Sasae, o le Ogototonu ma Sisifo.

E pei o si mea lea, o lona uiga o lea ua maua atu o le 4 ma le 4 ma le 3 ua 11 lava i totonu i i i Tulaga Faaalaalafaga aemaise foi o Nofoa Tu Taulaga. Ma le agaga faaaloalo, e fia faamanino mai ai le tulaga lea faamolemole.

FOFOGA FETALAI: Ia po o ua maua mai le tulaga lea e le Taitaifono lea e fia faamanino.

Afioga AUUAPAAU MULIPOLA ALOITAFUA MULIPOLA: Malo faafetai. Ona ua vave pai mai le sui usufono ae oo lava i ai i le faaiuga o fautuaga le Lipoti. Ae ua lelei la lea o le a tali vave atu le Komiti.

I le vaega lea e uiga i le Tu Taulaga ma le 10% lea e taua, o lea e fia avatu pe a oo i le vaega o le fautuaga a le Komiti. Aua o lea lava e manino le sui faaopopo o Aleipata Itupa I lalo na saofaga mai i le 10% lea, ae ui o lea, o le a ou tali atu i se taimi pe a faapea ou te liliu i le aotelega o fautuaga a le Komiti, aua o lea e fautua le Komiti i le auala la e tatau ona mautinoa lelei ai le 10% lea pe a oo i le fautuaga.

O le tulaga e pei ona faaali le finagalo o le sui usufono e uiga i Tu Taulaga ia, e le natia le tatou soifuaga iinei e fia autovaa mai uma o tatou alaafaga iinei i le taulaga i Apia, e fia maua le soifuaga lelei, o aoga lelei mo fanau aemaise o le lata i le falemai ma nisi tulaga (urbanization). Ma o le mafuaaga lea e ala ai

ona tele lola a Itumalo nei. Aisea? Aua e atagia i Itumalo nei le tele o fanua umia saoloto o lo o i ai, ma e le mafai lava ona faapea e toe solomuli le faateleina o lola ne i tulou lava le Maota. E tupu pea, e tupu pea lea ua tatou matauina. O le ala lea o le faaiuga a le Komiti ina ia taoto mai lava tuaoi faaleaganuu ia. A fonoa le Vaimauga o lo o i ai lava le faaleaganuu e fai ai, ae ua ala ona pei e lapopoa lola ia ma pei e puta le paluni vaecatu le... ona la o tagata mai o tatou afioaga i tua e omai e nonofo i latou faasinomaga o eleele ua latou faatauina ma atili ai loa ona tupu. O le mafuaaga lea lau Afioga o le sui sa tulai mai. Ae a faapea lava e fai lava ni nofoa mo Tu Taulaga mo i latou, ona o lava lea o latou e saili so latou sui i le Palemene e pei ona avatu ai le fautuaga aua e le auai i totonu o fonotaga a Nu'u Tu Mavae. O le mafuaaga lea, aua o Nu'u Tu Taulaga ia o Sasae, Sisifo, tulou, ae le gagavale foi le tilotilo i ai a le Komiti, tataua ona lagona ni o latou leo i le palota, e tataua foi ona o e faaleo o latou o sui o le Palemene.

E pei o le tali atu lea lau Afioga i le sui usufono na se i tulai mai. Ae i le matau i Itumalo Faaleaganuu lea ua i ai nei e pei lava ona matou fai atu e pei ona avatu i la matou fautuaga, e ese le vaevaega na vaevae mai e le Komisi o le Faiga Palota ina ia toe faatulai nisi nofoa. Peitai o le matou tilotilo i le isi vaevaega lea na sau ai, e i ai le... pe a faapea matou te tagai i ai, e i ai le Itumalo o lo o fua mai e vaevae i ai tagata nei e le o nofoia i faiganuu nei, ae matou te tilotilo e le taitai ona lava ai se itumalo i le numera o tagata o lo o aofai... O le ala lea o le matou fola e matou te le faaogaina le Lipoti lea i fuainumera a ua matua o se i saili tonu mai lava le anoliu o fea e maua ai fuainumera lea na fesoasoani mai ai le Lipoti a le Komesina a le Faiga Palota.

Oo mai lau Afioga i le Fofoga Fetalai e tusa ai ma nisi nei o Itumalo Faaopoopo i le Lipoti e pei ona i ai le Itumalo o Safotulafai ma le Itumalo o Asau ia Matia ma Matiaituau ma le Itumalo o Aiga i le Tai, e eseese vaega ma le vala na se i ave i ai le finagalo o le Komiti. E pei lava ona tatalo mai e le o atoa Puleono e tusa ai foi o le lē auai o Saleaula i le Nofoaiga lenei ma lona nofoa. O lo o avatu ai le fautuaga a le Komiti ina ia toe faafoi le nofoa o Saleaula e atagia ai le vaevaega faaleaganuu.

E faapena foi se tatalo atu ia Safotulafai ona e manino e tasi lea Pule ae le na o le pau lea o le vailiu na taga'i i ai le Komiti, e tasi lea Itumalo o lo o matauina le telē o le Lola Palota. E faapena foi le Itumalo ia Mati'a ma Matiaituau i Asau.

Ou oo mai lea i le Itumalo lea o Aiga i le Tai. Lau Afioga i le Fofoga Fetalai e faamanino le vala lea ona ou te le talanoa i le Itumalo lea faa-Taitaifono lau Afioga i le Fofoga Fetalai, ou te talanoa faa-sui usufono o le Itumalo, le sui usufono o le Itumalo. O lau matau ai i le Lola Palota sa faatino ai le Palota o le 2021 ana se mea e le sosoo faatasi palota ia o tagata Tu Taulaga agai i le Vaimauga ma Faleata, e numera tasi lava le Itumalo lea o Aiga i le Tai i le tele o le Lola. Ma ou te molimau atu o lo o i o'u luma nei faamaumauga. I le natura foi o le tatou feoa'i i le lauelele, tulou, ma le vaavaai atu i nisi o Itumalo ua vaeluaina faaleaganuu ua lua ai Tofi o Itumalo, ua leva na tataua ona fai se fuafuaga i le Itumalo lea o Aiga i le Tai. E pei lava ona ou fai atu, ou te talanoa i mafuaaga ua ala ai ona avatu le tulaga lea i le Itumalo lea. Ou te le talanoa ona

o le Taitaifono o le Komiti. Ae ou te talanoa i le taimi o lou sui usufono e faalagi ma avatu ou lagona i lau tilotilo faale-auauna a le Itumalo o le Itumalo lea. O le mea lea e ao ina manino ai le mata o le vai, leaga na i ai foi finagalo na lagalaga o nisi foi o finagalo na faapea mai e le agavaa le Itumalo e toe faaopoopo sona sui usufono. Ae ui o lea ua ou manatu ai, sa ou faapea foi nisi uso sa saunoa ai o ni o'u uso a o lea ou te iloa ua na o ni uo e mou mai ma toe mou atu. E ui o lea, o le faamalamalamaga lea o le tulaga lea i lea Itumalo, le paia o le Palemene.

Ona ou oo mai lea i nisi tulaga e pei ona i ai le tulaga lea na fesiligia e nisi o sui usufono pe afai e talanoaina Itumalo Tu Taulaga ia e tolu, i le agavaa ai o le sui tauva. E pei lava na ou fai atu, e tele nisi o le tatou atunuu ua alaala ma fai nofoaga nei ma o latou nofoaga tumau, o le a fai le faaiuga e le toe foi i afioaga e pei ona amata mai ai le soifuaga. O i la e mafai ona agavaa ai se matai o lo o nofo i lona nofoaga, umia le pepa o lona fanua umia saoloto, ua tatau la ona agavaa i le tulaga lea. Ae o le matai lava ia o lo o fai le monotaga po o Savaii po o fea lava o i inei, e tatau lava ona usitaia le monotaga la e fai ai ona o le agaga o le Komiti tatou ave faatasi le avanoa tutusa. O lea foi la na saunoa ai nisi sui usufono ina ia taumafai e uunaia sui tamaitai i avanoa ia i Nofoa Tu Taulaga. E sao, ae ia uunai tutusa la ma alii, ne i o tatou naunau e lilifa na o tamaitai ia ona tatou tilotilo lea i le Vaega 15 o le Faavae, e tutusa lelei aia e tauva ai sui ia. E pei o le faamalamalamaga lea i nisi o vaega sa lagalaga ai finagalo o le tatou Maota.

Oo mai se faamatalaga lau Afioga i le Fofoga Fetalai i le mataupu tau i O'o ma Momoli. Faafetai i fautuaga, faafetai i o outou finagalo faaalua, le paia o le Palemene lenei. Ae matau lava ma le toto'a i ia vaitaimi a o faagasolo mai le tatou Malo Tutoatasi, tasi ia vaega o le aganuu pe a faapea e faamanuiaina le sui usufono e toe fo'i i le Itumalo. Sei fai se tala ma se faafetai i le Itumalo ona momoli lea o lona O'o. Peitai e i ai foi le taimi e tatau ona fo'i i le Itumalo e faafetai i le tolu tausaga sa i ai, lea ua lima tausaga, faafetai mo la outou puleto. Ae tupu ia vaega ma lagona ma ia faanaunautaiga ma faataunuuga pe a lata ina uma le Paeaiga.

Ae i ai lona i le taimi lenei, o lo o i ai le Tulafono a le Komesina o Faiga Palota e gata mai le uluai tolu tausaga o le Paeaiga e faatino ai lea... Afai la e te faatino lou toe momoli o le faafetai i le Itumalo ma momoli sou finagalo e fia faaauau pea le tofi, ua noatia la i i ua le mafai la ona fai i totonu o le tolu tausaga lea aua ua noatia ai i i. Fesiligia po o le a le faamaoni o le avatu o le fautuaga i O'o ma Momoli. E tele finagalo na faaalua, se i faamanino. O le tuualalo a le Komiti, o le tai ma lona taaga ua ese foi lenei vaitaimi, taugata le soifuaga ae le natia le autovaa mai pea o Itumalo i ni fesoasoani a latou sui usufono. Ona i ai lea o le matou manatu, a i ai se avanoa tatou te faatulafono ai loa, taofi loa ae tatou o e talia manaoga o tagata. E le natia, o le vaitaimi lenei ia i tatou, tusi mai le Mafutaga a Tina, o lea vaega o le nuu ma lea vaega o le Itumalo, e tatou te o a e talia, e talia i le agaga o le tatou aganuu e tali faaaloalo. O le faamaninoga lea o le vaega lea o le lipoti lea ua tuuina atu e matou nei i O'o ma Momoli.

Ia, ona o’o mai lea lau Afioga i le Fofoga Fetalai, pei a ona matou fautua atu i fautuaga ia ua matou tuuina atu. Fautuaga muamua i le 10% pei ona ou fai atu e toe o’o i ai se leo, e le natia ona o le alavaa na o’o mai ai foi le Vaega Faaupufai ua tu nei e tauavea le Malo. O le fautuaga muamua lea a le Komiti ua matou tilotilo i ai ona e le o gagana lelei mai le Faavae e uiga i le 10% lenei. E pau lava le vaega o le Faavae lea matou te matauina, o se tina ua sili ana palota. Ae o le sailiga la o le amiotonu o le Faavae lea, e le o talanoa mai la le Faavae po o le a la le auala e fai ai le sailiga o palota ia.

O lea la e avatu faafautuaga e matou ona o lea e lavea le 10% e tusa ai o le Faavae, e ao la ona tilotilo lenei Maota i le teuteuga o le vaega lea o le Faavae aua o lo o aafia le 10% pei ona talanoa mai ai le Faavae lea. Aua o le faitau atu e tusa ai o laina ma vailaina o le Faavae o lo o talanoa i le tina e sili palota. Ae, o le fesili, o le a la le auala e fai ai le tina e sili le palota? Na ese la le faiga lea na fai ai, aua leaga e ese la le formula lea na saili ai la le tina e sili palota, ina ia saili le popularity o le tina na sili palota.

O le uiga la lea o le fautuaga ina ia mapo lelei le taoto. E faapefea ona saili mai tina se i faaatoa la le numera lea? E tatau la ona talanoa e faamapo lelei le Faavae aua e le o atoatoa le talanoa a le Faavae i le tulaga lea. O le uiga lea o le fautuaga muamua i a outou Afioga.

O’o mai i le tele o isi fautuaga o lo o avatu e le Komiti, ia masalo o lea lava ua taoto i ai le tele o finagalo o le Maota lenei i le tele o finagalo faaalua ia ma le tele foi o nisi vaega o tulai mai. Ae o le tele lava o finagalo a outou Afioga ua talia le tele o nisi vaega o le lipoti, vagana lava nai vaega laiti e mafai lava ona fetuutuunai iai. Ae o le atoaga lava i le paia o le Palemene ia o le mamalu lea i le Pulega Faatonu e tuu atu i ai le Lipoti ma le latou foi matafaioi, ona toe faapena lea ona faaauau mai i se isi laasaga e faatamoe ai lenei Lipoti ma lona natura e tasi i totonu o le lima tausaga.

E faaiu atu au tala lau Afioga i le Fofoga Fetalai, e fautuaina e le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae le Fono Aoao, *Ina ia faamaonia le P.P. 2023/2024 Nu.37, Lipoti a le Komisi Suesue o le Faiga Palota 2021, Fepuari 2023 faatasi ma Teuteuga a le Komiti, ma ia tuuina atu i le Pulega Faatonu po o le Kapeneta mo le tapenaina ai o suiga talafeagai o le Tulafono.*

Lau Afioga i le Fofoga Fetalai a o maua pea lou avanoa, se i ou afe tasi i sina minute se tasi i lou Itumalo o lo o faafogafoga mai.

Le paia o lou Itumalo, le Susuga Tutasi e le toe faasilia se leo o la outou tapuaiga. Aufaigaluega tofofi a le Atua, faamalo faafetai. Le paia o le Toafa o Alii ma le Toalua o Tulafale ma upu ia te oe le Falemanono, Luatutu le Tapunuu ma le Alo o le Malietoa, faamalo i la outou tapuaiga a o i ai la outou auaunaga i le Maota Fono a o ni tofiga foi e auauna ai i le Malo o Samoa.

Taliu mai ia Sau ma Sa Sau ma le paia o lo outou Aiga, e faapea foi Lilo aemaise le... ia faamanuia le Atua i le tatou afioaga i Apolima.

Ia, le susu foi o Usoalii ma Alo o le Malietoa, afio le Tapaau, susu mai, Fuailefau ma Pouli, le Fetalaiga ia Ati ma Lautolo. Ia manuia, faafetai i la outou tapuaiga.

E faapea foi afioaga aua le afio o le Aloalii, afio le Matua Taulagi, Tapaau o oe le Lilomaiava, le Tamaitai tasi o Aana, maliu mai lau talifetalaiga, alaalatai le Matua ia Peipeigamalie ma le nofo a ituaiga ia te oe Satuimalufilufi. Faamanuia le Atua i la outou tapuaiga. E i ai foi se taimi tatou feiloai, ae faamalo le tapuai.

Le tapuaiga a Samoa i la outou faafofoga mai, faafetai tele i la outou tapuaiga. Ia ua tatou faatasi ma Ofisa Sili o Pulega o Matagaluega ia maua pea lo outou onosai e tautua le tatou atunuu.

Samoa o faafofoga mai i fafo atu o lenei atunuu, faamanuia i la outou tapuaiga ma la outou maa o togi mai aua le tamaoaga o Samoa.

Faamanuia lau Afioga i le Fofoga Fetalai ma le galuega fita aemaise foi le paia o le Palemene o potopoto. Soifua ma ia manuia, maua lou ola e tautuaina le atunuu ma le agaga faafetai.

Na faamaonia le lafo ma tulai ai le Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2023/2024 Nu.37, Lipoti a le Komisi Suesue o le Faiga Palota 2021, Fepuari 2023 ua faamaonia.

FOFOGA FETALAI: Ou te tapa ma le faaaloalo lau Afioga i le Taitai o le Malo, lau Afioga i le Tamaitai Palemia mo lau Saunoaga.

SAUNOAGA A LE AFIGOGA I LE TAMAITAI PALEMIA MA LE TOLOPOINA

Afioga Hon FIAME NAOMI MATAAFA (Lotofaga): Lau Afioga i le Fofoga Fetalai ma sui usufono mamalu o le Palemene, le tapuaiga a Samoa i ona tulaga faalupe, ua faaiuina le tatou mataupu sa lauliliuina e le Palemene i luga o le Lipoti a Komiti o le Palemene i le Lipoti a le Komisi Suesue mo Faiga Palota.

Lau Afioga e faamauina le agaga faafetai i ia tapenaga uma, le galuega a le Komisi ma le mamalu o sui sa faapea ona valaauina e faatinoina lea galuega taua, aemaise foi le Afioga i le Taitaifono ma sui usufono mamalu o le Komiti a le Palemene lea ua faamaonia le latou Lipoti.

Lau Afioga i le Fofoga Fetalai ou te tulai atu i le tulaga o le Taitai o le Malo po o le Pule Faatonu ia ma le faagasologa o le tatou galuega lenei. E le o se tulaga fou le faagasologa o tapenaga mo le faaleleia pea o le faatinoina o filifiliga a le atunuu e tauala mai i Faiga Palota. E matau atu i finagalo faaalua i totonu o Lipoti aemaise foi saunoaga a sui usufono, ia, e feagai pea tatou ma luitau.

E malie foi i le faalogologo nisi foi o mau e faapea e leai ni mea fou o tulai mai i ia foi mataupu ua tatou felafolafoai ai, ae ou te talitonu lau Afioga i le Fofoga Fetalai, a faapea e i ai ni mea fou, o le tatou galuega e tatou te tali atu ai i ni mataupu ua autausaga ma fia Paeaiga o lo o feagai pea ma tatou

Faigamalo ma tatou tapenaga mo Faiga Palota. Atonu lau Afioga o lea e matau mai, o le toatele o le Aiga Kapeneta sa tapuaia lava le felafolafoaiga i luga lava o le agaga aua e auala mai le Lipoti leni i le Kapeneta ma tapena mai ai ni Teuteuga talafeagai e pei ona atagia mai i le Lafo a le Afioga i le Taitaifono.

Sa valaaulia au e le Afioga i le Taitaifono ma le Komiti ma sa ou manatu pe talafeagai lou oo mai i le Komiti ona o le agaga lea e auala atu lava le Lipoti a le Palemene i le Laulau-a-Fono a le Kapeneta. Ae ua laualuga i le faamoemoe le tulaga foi lea o le tumatila o le pule Faa-Palemene ma e tatau ona faaaloogia le valaaulia a le Afioga i le Taitaifono. Ae i lou oo mai o le saunoaga a le Taitaifono e fai ma sui o le Komiti o lou valaaulia i le Komiti o lou tulaga o le sui usufono o le Itumalo Lotofaga ae le o le tulaga o le Palemia ona o lea foi e manino i lo latou finagalo. Lau Afioga e faalogologo ma le totoa i leni vaiaso i finagalo faaalua, e tele le taua o nisi foi o finagalo... ua folasia. Ia, o le a tapena atu foi le pitolaau a le Pule Faatonu, e le gata o le aoao mai o outou finagalo e taua mai foi i le Lipoti a le tatou Komiti o le Palemene ae tatou te manino foi aemaise nisi o tatou ua leva ona i ai i le Maota leni. E i ai foi papuipui faale-Tulafono e tatau ona silasila i ai aemaise pe a faapea e faatulai mai ni suiga e tatau ona fai po o ni suiga foi ua lilifa i ai le finagalo o le Maota. A faapea e i ai se mataupu i lau lava faalogologo i le felafolafoaiga o le vaega lea o le va o le aganuu ma se vaaiga o faiga faaalatua. E tasi lava le itu e puipui i ai ina ia aua ne i faauigaina o faiga faaalatua ae lanu i le aganuu. E le o se mea lelei lea. Ae tatou te vaavaai totoa pea i ai, ona e talanoia pea i lea Nofoaiga ma lea Nofoaiga. Ia tatalo i le Alii e aumai le manino, taitai mai so outou finagalo ma se tatou manatunatuga e mafai ona faagasolo ai ia ituaiga mataupu e tulai mai pea.

O lea e maua i saunoaga i isi atunuu ma Pulega Faatemokarasi e le o toa le fesuaiga o Faigamalo ona e le o i ai lavelave i mea nei tatou te gasolo ai i faamasinoga. Ae tatou te gasolo lava ona o faiga faaalatua o le tele lena o tatou mataupu. Ia e le o se mea lelei i se vaaiga, e faapea e ala ona faapea ona le faafaigofie le fesoloai o Faigamalo ona o lo o tupu ma loloto faiga faaalatua. O le vaaiga lena e mafai ona lanu ai se vaaiga mo tatou ma le tatou galuega faasui usufono. Ae ou te manatu i lau Afioga i le Fofoga Fetalai, e fai au ma sui o le Kapeneta e talia lelei ai le faaiuga a le Palemene ma le faamoemoe e vave tapena mai ni suiga talafeagai e lava ai le taimi e sauni a o lo o loma se tatou palota o i le lumanai.

Ia manuia tele leni aso. Soifua ma ia manuia.

FOFOGA FETALAI: Ua faamalo faafetai malele i lau Afioga i le Tamaitai Palemia. Ua lagona foi e le Maota i le auafa talagata. Ia malo faafetai le tanoa. Ua faafofoga le tatou Maota ma e i ai le manatu o le a le toe faasilia foi se upu a le Fofoga Fetalai. Ua lava ma totoe le saunoaga a le Taitai o le Malo e palefeagai ai foi le maualuga o le Palemene. O lea ua tatou i ai i le taulaumea o galuega o leni aso a o le faaiuga foi o tatou taualumaga mo leni masina. Na o le pau lava o lea, ua faamalo faafetai mo le tofa tatala ma le utaga sasaa e ala i saunoaga ua taoto i le Maota. O se tasi leni o galuega tutoa i so o se Ppaeaiga

a le Palemene. Tatou lalafu laia i le paia o le Kapeneta e tusa o le faamaoniga a le tatou Maota. Alofagia e le Atua le tofa i le Pulega Faatonu. Peitai a i ai se upu a le Fofoga Fetalai ua sala i le tatou faafoeina i tatou taualumaga ia faamagalo le Nofoa, e poto lava le tautai ae sese lava le atu i ama.

Ae o le tatalo faaauau a le Fofoga Fetalai, ia saga faamanuia le Atua i le paia o le Palemene. Ia sagai ane ai o le tai i le taitaiga i lau Afioga le Tamaitai Palemia, ia i ai foi Lona agalelei i le saofaiga paia a le Kapeneta, aemaise o le lagolagosua a Afioga i Minisita Lagolago.

Ia i ai foi le faamanuiaga a le Atua i lau Afioga i le Sui Taitai o le Itu Agai ma sui usufono uma o le Palemene. Samoa i lau tapuaiga, e momooli atu le faafetai. O faiva lava e tapuaia o faiva e manuia. E faapena leni vaiaso a o feagai ai le Palemene ma ana fonotaga. O lea ua iu ma le manuia ona o lau tatalo ma lau tapuaiga. Faamagalo se sese o lau Palemene i se gagana ua sala i lau faafofoga tapuai mai. O le tatalo ia tumau faamanuiaga ma le filemu o le Atua i si o tatou atunuu.

Le tapuaiga a Ofisa Sili o Pulega o Matagaluega ma Faalapotopotoga Tumaoti a le tatou Malo faapea foi auunaga lagolago uma sa tautuaina le Palemene a o feagai ai ma fonotaga. E momoli atu le faafetai tele. Ia saga faamanuia le Atua i la outou tautua malo. O le a faia se tatou malologa. Ae tatou te le i tolopo ou te talosaga atu i le sui usufono mo Aana Alofi 2 e saunia se tatou tatalo e faaiu ai le tatou Fono.

Na tolopo Taualumaga a le Fono Aoao Faitulafono i le itula e 1.17 i le afiafi seia aulia le Aso Lua, 19 o Tesema i le itula e 9.30 i le taeao.